

JEHOVA-JIRE ²

Ke a leboha, Moena Roy. Ha re emeng motsotso feela re sa ntse re rapela. Re inamisa lihloho tsa rona, ha le rata. 'Me ha re nahaneng joale haeba ho na le ntho e 'ngoe ka pelong ea hau eo u ka lakatsang Molimo ho u araba ka eona, bosiung bona, kopo e itseng, e tsebise feela ha u phahamisa letsoho, le ho re, "Ke na le kopo pel'a Molimo." Joale ha re inamiseng lihloho tsa rona ha re rapela.

² Ntata rona ea Leholimong, re nka ona e le monyetla o moholo hakana, ho tla ho Uena; ho tseba sena, hore ha re tla ka Lebitso la Morena Jesu, re tšepisitsoe hore re tla fumana seo re se kopang. Joale ha re tle Teroneng ea Kahlolo. Ruri ha re batle ho fihla mono, kapa Teroneng ea Toka. Empa re... ho tla Teroneng ea Mohau, moo re—re nang le bonneta ba hore likopo tsa rona li tla nyeheloa. Hoba, re ne re ka sitoa ho emela kahlolo ea Hau, hape re ne re ka sitoa ho phela ka toka ea Hau, empa mohau oa Hau ke ona oo re o kopang. Joale, Morena, re tšoarele libe tsa rōna. Re rapela hore U tla aba hoo, le hore U be le rona bosiung bona, ho araba kopo e 'ngoe le e 'ngoe eo matsoho ao a neng a e emela ha a ne a phahamisoa. U tseba se neng se le ka tlas'a letsoho, ka pelong. 'Me, Molimo, ntle le pelaelo e ne e le bakeng sa ho kula, le poloko, le baratuoa. Re rapella bosiung bona, Ntate, haholo-holo bakeng sa bao, hore U tle u ba abele likopo tsa bona.

³ Joale esale re bua ka mohlanka oa Hau ea tšepehang, Abrahama, re tsoelapele le eena bosiung bona, leetong la hae. Re U rapela ho re hlohonolofatsa ha re theoha tseleng ea lilemo tse makholo tse fetileng, 'moho le mohlanka ea tšepehang ea lumetseng Lentsoe la Hau. Ebe mohlala, joaloka ha Pauluse a boletse ho Baheberu, oa seo Abrahama a neng a le sona, mohlala. 'Me re rapela hore eena, tumelo eo a neng a ena le eona, e tle e senoleloe rona bosiung bona; ho lumela Lentsoe la Molimo, le ho se Le belaele, Lentsoe le le leng la Lona, empa ho Le lumela lohle, le ho lumela sohle seo A se buileng. 'Me re khone ho itšoarella litšepisong tseo A re etselitseng tsona, le ho ba bana ba Abrahama ka ho ba ho Kreste. Re e kopa ka Lebitso la Jesu. Amen.

Lulang fatše.

⁴ Moena Borders o molelejana ho mpheta, ke tlameha ho theola maekrofono ke hona. 'Me ke monyetla ho ba mona bosiung bona kopanong ena hape, le ho rapella bakuli, le ho etsa eng kapa eng eo Moea o Halalelang o re laelang ho e etsa. Ke batla ho bua sena, ka thoholetso. Har'a maeto 'ohle a ka ho pholletsa le U.S., United States le Canada, Ke bone ntho e 'ngoe maobane bosiuk e nthabisitseng ho feta litulo tsohle tsa mabili tseo ke li

boneng li le lephaka, 'me melangoana eohla e robetse, lifofu li bona, litholo li utloe, limumu li bue, bafu ba tsosoa, ngaka e saenetse setamente se reng "mothro o ne a shoele, 'me a tsosoa." Seo sohle e bile se thabisang. Empa ha ke bona batho maobane bosiu, bao e leng maloko a kereke, ba amohela 'Nete le ho ema hantle hara batho, ho ipolela ba fositse 'me ba ikemiselitse ho etsa se nepahetseng, e ne e le ntho e fetisang ka molemo eo ke e tsebang.

⁵ Kereke, mohlomong Monyaluo o se a khethiloe. Ke, ho Mo hlophisa joale. Ho Mo fumana . . .

⁶ Tsoseletso e felile. Re tseba seo. Moea oa tsoseletso ha o sa le eo. Lihora tse peli tsa tšebeletso, bohole baa ttleba. Tsoseletsong, ke motshehare le bosiu, ka linako tsohle, ha e khaotse. Tsoseletso e felile. 'Me ka hona re mpa re khoalapisa feela.

⁷ Abrahama o ile a tlameha ho fufuleloa ho fihlela a fumana semelo. 'Me hoba a fumane semelo, ntho e latelang e ne e le ho mo hlophisetsa ho kopana le monyali. Ke ntho e latelang. Le sa hopola mohla a neng a mo fumana? Nakong ea mantsiboea, leseli la mantsiboea.

⁸ Ho omanya basali le banna, 'moho, bosiung ba maobane; le ho ba bona, ka ho hlompha Lentsoe, ba ema 'me ba lumela hore ba fositse, ba batla tšoarelo ea Molimo, le ho tsoella; sena ke sebaka sa ho tšoara tsoseletso. Haeba ho ka hlaha tsoseletso efe eo ke e tsebang, e ka etsahala hantle mona, moo lipelo li tšepehang! Hobaneng? U na le ntho eo u sebeletsang holim'a eona, u a bona. Ho hong . . . Bongata ba bona bo a ikhohomosa, ha ba batle ha u ba bolella ka eona; hopolang feela, mofuta oo oa peo ke peo ea mokhatlo oa bolumeli, ha se Peo ea Abrahama. Peo ea Abrahama e bona Lentsoe, 'me e lumela Lentsoe, kapele.

⁹ Mohla seotsoanyana seo, selibeng bosiung boo, mosali selibeng . . . Baprista le borabi ba ne ba eme ka mathoko, ba talimile Jesu a ntse a sebetsa, a ba hlakisetsa pontšo ea Hae ea boMessia, pontšo ea Mangolo, 'me ba itse, "Ke Belsebule, liabolosi, senohe."

¹⁰ Empa hang feela ha Leseli leo le chabela mosalinyana eo, eitsheha A 'molella seo a se entseng, a re, "Monghali, ke a bona hobane U Moporofeta. 'Me re a tseba hore Messia o a tla, 'me, mohla A tlang, O tla re bolella lintho tseo." Le a bona, hang Peo eo e reriloeng ea e tšoara, hoba e ne e le Peo ea Abrahama, ka 'nete. 'Me o bone Leseli. E ne e le Lentsoe. O tsebile hoba Lentsoe le tšepisitse hoo, mohla Messia a tileng, O tla etsa lintho tseo, 'me a e elelloa.

Jesu o itse, "Ke 'Na Ea ntseng a buang le uena."

¹¹ O ile a matha a kena motseng 'me a leka ho kholisa ba bang. A re, "Tloong, le bone Monna Ea mpoleletseng tseo ke li entseng. Na enoa hase eena Messia?" Le a bona?

¹² Joale lentsoe feela ho likhaitseli tsa rona. Haesale ke nkaoa ke le mohloea-basali, empa ha ke joalo. Le a bona? Ha ke sa le ngoana e monyenyan, ke fumane boiphihlelo bo bohloko; empa esale ke hlompha haholo mosali eo e neng e le mosali, mofumahali. Empa ha ke na lihlompho tsa letho ho bao ba ipolelang joalo athe ha se bona. Ke rata ho bona mofumahali, mofumahali oa makhonthe, ke lehakoe.

¹³ Tsatsing lena mohla basali ba khopameng, ba khopamisitsoe haholo matsatsing ana a ho qetela. Lengolo le bolela joalo. Hobaneng? Ke pheletso ea mongoaha. Le sa hopola khopamiso ea pele e bile efe? E ne e le mosali. Ke hantle. 'Me letsatsing la ho qetela! Ha re eso fumane sena le ka mohla; re bile le lilemo tse likete tse tšeletseng moo mafumahali a ileng a leka ho lula e le mafumahali. Joale ba leka ho itšoara joaloka monna, ho apara liaparo joaloka monna, ho poma moriri oa bona joaloka monna, le joalo-joalo. Ha ba eso etse joalo mongoaheng ofe feela. Bibele e lepa sena esale pele, hore ba tla etsa sena matsatsing a ho qetela. 'Me ke lona bana, khopamiso ea basali. Ha ho makatse ha Bibele e boletse, "Ba phonyohileng ba tsoa—tsoa ho—ho tsoa Sione ba tla khanya mahlong a Morena, letsatsing leo." Bonang, kamoo bao ba phonyohang!

¹⁴ U re, "Ha e etse phapang ea letho." Ehlide e etsa phapang. Motho o mpoleletse haufinyane, ho re, "Moena Branham, nthoana eo ha e etse phapang."

¹⁵ Ka re, "E entse ho Pauluse. 'Me Pauluse o itse, 'Ekareha lengeloi le tsoang Leholimong le fihla 'me la ruta ntho efe ese, le rohakoe.' Leha e ka ba moreri, kapa lengeloi, kapa bishopo, mopapa, kapa e ka bang eng, a rohakoe haeba ntho e le khahlano le Sena." Le a bona, ke hantle feela. Bagalata 1:8, ha le batla ho E bala.

¹⁶ 'Me a re, "Be, ha ke nahane . . ." Ho re, "Ke bone basali ba moriri o mokhutšoane, ba le bonolo 'me ba le mosa."

¹⁷ Ka re, "Ke hantle feela, le 'na ke bone seo. Empa ha se eona. Le a bona, u loketse ho tla ho seo Bibele e se boletseng!"

¹⁸ Holane Molimo o itse ho Moshe, "Rola lieta tsa hau," 'me a re, "Morena, na nka rola katiba ea ka, feela"? Le a bona? U tlameha ho etsa seo Molimo o se laelang ho etsoa! 'Me bothata ba eona, ha ke nahana, se ntoutisang haholo ka eona, ke hore bareri ba mamella ntho e joalo! Ke eng? E a bontša hore ke Adama oa mehla ea joale ea tsoileng le mosali oa hae. Le a bona? Molimo o batla Adama e mong ea emang le Lentsoe, 'me Eena feela, Lentsoe feela. Lentsoe le nepahetse, ho sa tsotelehe! U se ke ua nka tsela eo.

¹⁹ Le ka mohla, lilemong tse likete tse tšeletseng, ha ho mohla basali ba kileng ba lakatsae ho kuta moriri oa bona, ho apara joaloka monna, ho khopama. Re nakong ea bofelo. 'Me Amerika, mang ea tsebang boporofeta, o tseba hore Amerika e emetsoe ke

mosali. Ena e bitsoa “tokoloho ea basali.” Tokoloho ea eng? Ho etsa borata, sebe.

²⁰ Mosali a ke ke a etsa seo a se batlang. Bibebe ha e bolele joalo. Mosali ke khoabi ea monna. Ha a eo le popong ea mantlha. Ke hantle feela. O nkiloe ho monna. Monna e ne e le botšehali le botona ‘moho; O ntšitse moea oa botšehali ‘me oa o kenya khopong e tsoang lehlakoreng la hae. Mamelang! Na le hlokometse mohla Rebeka a ileng ho kopana le Isaaka, eitseha a tlola a theoha kamele, a ikoahela sefahleho ka lesira? Hobaneng? O ne a tla hloohong ea hae.

²¹ Ha ba e tsebe. Ba loketse ho e etsa, leha ho le joalo. Na le hlokometse mosali ha a nyaloa, o rikoahela ka lesira sefahlehong? Hobaneng? O tla hloohong ea hae. ‘Me Kereke, Kereke, e leng Monyaluo, e loketse ho ikhurumeletsa hole le tumeloana efe feela, e tla ho Hlooho ea eona, Lentsoe. Kreste ke Lentsoe, ‘me ke Hlooho.

²² Joale, metsoalle, ha ke batle ho qala ka taba eo. Ke—ke—ke ne ke shebile mono kajeno, lithero tse ka bang makholo a mahlano, litemana tse batlang li feta makholo a mahlano, tsa lithuto tse tebileng tsa Bibebe. Empa ke batla feela ho lula le Abrahama bakeng sa kopano ena, ka mokhoa o itseng.

²³ Le a tseba, ke a lumela Morena a ka khona, haeba baena ba sa tsotelle, ‘me haeba e mong le e mong, ke rata ho khutlela mona le ho tšoara tsoselsetso moo u ka lulang nakoana, le a bona, moo re ka theohang ruri le ho bona feela. [Phutheho e opa liatla—Mohl.] Kea leboha. Kea leboha. Kea tseba hlapi e teng mona, ke—ke—kea e tseba. ‘Me ke rata ho tšoasa lihlapi. ‘Me u fumane thepa eo u sebetsang ka eona, motho ea tšepahang. Mang a ka fosa. Ha u tsebe; ke shoa letsatsi le letsatsi, liphosong tsa ka, le ho leka ho phela pel’ a Kreste. Le mang ea holileng ho lekana, ‘me a na le Moea o lekaneng oa Molimo ho nyoloha le ho amohela hore o fositse, ho re, “Ke batla ntho e nepahetseng,” Ke na le tšepo e ngata mono, hoba, eo ruri ke Peo ea Abrahama. Ba batla ho E tseba. Ha ba E tsebe pele ba E utloa. Empa E tlameha ho utluoa pele, ho thoe, “Ebe rona . . . ha moreri a le sieo? ‘Me ‘moleli a ka bolela joang a sa rongoa ke Molimo?” Eo ke ‘Nete hantle. Joale, hlokomelang joale.

²⁴ Re khutlela ho Abrahama joale. Re mpe re khutlele ho eena, ka hona, ‘me re e tsoellise. Na le nkutloa hantle, holimo seotlong holimo mono? Re a . . . Ho monate ho bona, bosiung bona, letšoelie le letle hakana. Le batho ba ratehang hakana mona. Ke ‘nene . . .

²⁵ Ke ne ke qoqa le motsoalle kajeno, ea tsoang Canada. Morena o ne a ntataisetse tlase teng ke loketse ho shebella ntho ho etsahala. ‘Me ka ho ema . . . Motsoalle enoa, ka kopana le eena, ‘me a ntse a qoqa ka mosa oa batho ba Amerika. ‘Me ka re, “E, ‘me ka mona ho na le ba bang bao e leng—e leng Peo e reriloeng ea Molimo, ka hare le ka mathoko a libaka tsena, le tulong e

khopo ena ka ho fetisisa." Ha ke bolele motse oa heno mona. Motse oa heso, oo ke tsoang ho oona, o khopo joaloka oa heno. Empa lefatše lohle le khopo, empa mafilo 'ohle a hoholetsoe nqa Bophirima. Re tseba seo. Tsoelopele e haotse le eona. 'Me moo tsoelopele e leng teng, sebe se kena mono. Ke hantle. E shebeng holimo le tlase mona. Lena ke lebitla la moreri. Ke hantle. Shebang Los Angeles, ntho e 'ngoe le e 'ngoe le bora-seng bo bong le bo bong bo boba hantle ka mono, e mong le e mong o tšoere tumeloana, thuto. Ho kenya Lentsoe ka mono, ha u khone. E silafetse haholo! Ke hantle. Matemonia, boliabolosi, hantle setulong sa Satane! Empa leha ho le joalo hara eona eohle, Peo tse ling li teng ka mono, hape. 'Me u ka etsa ho le hong feela hona ke ho hasa Leseli. 'Me haeba lefe la Leseli leo. . . Ha Peo e le teng mono, e tla phela hang ha Leseli le e chabela. U tlameha feela ho jala Leseli, ke phetho. 'Me eena Ke Leseli la mantsiboea, re tseba seo, Lentsoe la Hae.

²⁶ Joale, maobane bosiu re ile ra tlohela Abrahama. Ke ile ka qala ka-ka khaolo ea 22, empa ha kea e qeta, hobane ke ile ka khutlela holim'a seo Abrahama a neng a le sona tšimolohong. 'Me re mo siile maobane bosiu moo Molimo a neng a tiisa selekane le eena. Oh, ke rata seo. Ho hahola sehlabelo, ho etsa e-e selekane le Abrahama. Le kamoo re fumaneng. . . Mohla A neng a bitsa Abrahama, 'me a tla tiisa selekane ho eena, O mo laetse ho nka liphoofolo tse tharo tsa lilemo li tharo, a li khekhethe. 'Me re fumane botharo. Ha re na nako ho kena ho eona. Khele, u ka lula holim'a eona, taba e le 'ngoe hantle mono, ho fihlela hoseng, e ke ke ea hlalosoa. Empa u batla u otla lihlooho feela, le ho lebella Moea o Halalelang nakong ena ho senola tse ling tsohle.

²⁷ Joale, kamoo phetheho, Sehlabelo se phethahetseng, phetheho, Molimo o phethahalitse bophelong ba motho seo A neng a tla se etsa. Rea tseba re na le. . . Re ne re e-na le Molimo Ntate, eena e ne e le Jehova ea Matlaohle. Mohlang oo Hoo ho ne ho le Topallong ea Leseli, ho fetisa Israele lefeelleng. 'Me Eena Jehova eo a fetoha nama le ho aha har'a rona, ka sebopaho sa Mora oa Hae a 'notši, ho bopa Tabernakele bakeng sa Sebele sa Hae ho aha ho eona, Molimo o bonahatsoang nameng. Botlalo ba BoMolimo bo ne bo ahile ka ho Eena ka 'mele, ponahatso e phethahetseng. Joale (ka selekane) karolo ea Hae ea botho e ile ea tlosoa, ho aroloa, hore A tle a (selekane sena) a arole 'Mele o shoeleng, Mali a neng a tšoleloe tšoarelo ea libe, le ho O phahamisa le ho O bea letsohong la Hae le letona, le ho khutlisetsa Moea ka Letsatsi la Pentekosta. 'Me bona Bophelo bo phetsoeng ka ho Kreste Jesu bo loketse ho pheloa bathong ba selekane, Bophelo bo le bong bo etsang ntho e tšoanang. Jesu o boletse ho Johanne 14:12, "Ea lumelang ho 'Na, mesebetsi eo Ke e etsang o tla e etsa le eena." Joale, hoo ho lokile kapa ho fosahetse. E tlamehile ho loka! Ho 'na, Lentsoe le leng le le leng la Eona le nepahetse. Lentsoe le leng le le leng le nepahetse

ka ho phethahala. Hlokomelang kamoo Molimo o khanyang o sebetsang kateng.

²⁸ 'Me hape kamoo tseo tsa Ntate...Joalokaha Mattheu a boletse, "E-eang ke hona, le rute lichaba tsohle, le ba kolobetse ka Lebitso la Ntate, Mora, le Moea o Halalelang." Le a bona? Joale, Ntate...Ha e bolele hore re na le Melimo e meraro. Re na le Molimo o le mong ka liofisi tse tharo (boNtate, boMora, Moea o Halalelang), Molimo o le mong maobane, kajeno, le kamehla. Ke hantle haholo.

²⁹ Joale hlokomelang kamoo seo se bonahalitsoeng ka ho khanya ho Abrahama, le kamoo Molimo, Leseling lena, o ileng oa pholletsa lipakeng tsa mekhekhetlo ena, oa e hahola. Joalokaha...Re ne re e nkile maobane bosiu, kamoo ba neng ba etsa konteraka, ho e ngola le ho e tabola, li tšoanelia ho momahana. Konteraka e tlameha ho momahana.

³⁰ Joale le a bona, metsoalle, ke seo ke lekang ho se bolela. Esita le hara batho ba rona ba Pentekosta, ho hlahla liabolosi enoa oa hlalefo, ho leka ho etsa batho...Joale, ke lumela lineong tsohle tsa Molimo. Ke lumela ho hoeletsa. Ke lumela ho bua liteme. Ke lumela linthong tsohle tseo Molimo o li boletseng. Empa koana u ke ke oa itšetleha ka efe feela ea tseo e le hobaneng u fumane Moea o Halalelang. Ua bona, bophelo ba hau bo tlameha ho khema le eona. Le a bona? Hau... "Ka litholoana tsa hau u a tsebjoa." Le a bona? 'Me ke tsona lintho tse ntšoenyang kajeno, hobane ke bona kereke ea heso, kereke ea Pentekosta, e fetoha seo "sebopoho sa borapeli," ho tloha 'Neteng. Le ho ba tlisetsa 'Nete ea Lentsoe, ba ikhula ho Eona. Le ho ba kopa, "Tloong, le lule le 'na," ba ke ke ba e etsa. Le a bona, hoo o bontša phoso e leng teng. Ke eona ntho e ntšoenyang. 'Me, joale, ha se mokana ke le khahlano le kereke ea heso. ke...

³¹ Haeba ke rata Kreste, molemo o fetisang e ka ba ho ithorisa ka Kereke ea Hae ho feta ho ithorisa ka Eena. Hobane ke rata ha u ka rorisa bana ba ka ho feta ho rorisa 'na. 'Me, hopolang, ke nahanne khafetsa, ha nka fumana marotholi a mabeli a Mali a makhonthe a Jesu sejaneng, kamoo nka tšoarang Hoo, hore ke se tšohe ke A qhala. Ke ne ke tla tsamaea ka hloko haholo. Empa bosiusing bona ke tšoere ho fetisang hoo, mahlong a Hae, ke tšoere se rekiloeng ke Mali a Hae. Le a bona, O le tšolotse Mali a Hae. 'Me ke 'na enoa joaleka moreri bosiusing bona, ke tšoere, kapa ke le supisa mafinyellong a Bosafeleng ba lona. Ka hona nke ke ka lebisa ho tumeloana efe kapa thuto efe; e lokela ho ba Lentsoe, hobane ke eona ntho e tlang ho tšoarella. Tumelo ea ka e hahiloe holima Lentsoe, 'me Kreste ke Lentsoe. 'Me haeba Kreste a entsoe Lentsoe, ke moo Lentsoe le bonahatsoang hantle har'a rona. Le a bona, e loketse joalo!

³² Joale, ka baka leo, ke lumela hore Molimo oa Testamente ea Khale, sohle seo A neng a le sona, O se tšolotse ka ho Jesu

Mora oa Hae. 'Me sohle seo Jesu oa Testamente e Ncha a neng a le sona, O se tšolotse ka hara Kereke eo A e rekileng ka Mali a Hae ka Sebele. Le a bona? "Ho se ho se hokae 'me lefatše," *kosmos* mono, tsamaiso ea lefatše, "ha le sa tla Mpona. Empa lona le tla mpona," *lona*, Kereke, "hobane Ke tla ba le lona, le ka ho lona, ho isa bofelong ba lefatše." Ke moo Bophelo, Konteraka eo, Moea oo o ntšitsoeng ho Kreste mane Kalvari, o khutlisoa le ho tšolleloa holima batho, Peo ea Abrahama, eo Molimo o e etselitseng tšepiso. Hopolang, e ne e sa lebisoa ho lipeo tsohle tsa hae, empa "Peo."

³³ Joale, e teng thuto ea boitherelopele e bolileng, bosaoana. Empa boitherelopele ba mannete bo teng. Molimo, ka boitsebelopele, o ne o ka rera esale pele hobane O na le boitsebelopele. Molimo ha o rate hoba mang a ka timela, empa, ka ho ba Molimo mohlokaphetso, o tsebile ea neng a tla timela le ea neng a ke ke.

³⁴ Ke ka hona O boletseng le pele Isaaka kapa—kapa... pele Jakobo kapa Esau a hlaha, O ne a hloile Esau 'me a rata Jakobo. Boitsebelopele ba Oona bo O tsebisa hore Esau e ne e le molotsana, 'me Oa Mo tsebisa hore Jakobo o hломphile tokelo eo ea boholo; ho sa tsotellehe kamoo a e fumaneng, o ne a e batla. Joale, bashanyana bobeli, mafahla, ba tsoetsoeng ke 'mè le ntate a le mong ea halalelang, empa e mong e ne e le mokoenehi e mong e le e—e molumeli. Joale Molimo, ka boitsebelopele ba Oona, o tsebile hoo.

³⁵ Joale, Molimo, ka boitsebelopele, ha O—O laole khoebo ea Oona joalo... U ke ke oa laola khoebo ea hau joalo, holim'a lehlaku le lokotsehang joalo. Molimo o tsebile, ka boitsebelopele, ea neng a tla bolokeha, ka hona Oa romela Jesu ho tšoara bao O ba boneng esale pele hore ba tla bolokeha. Balang Baefese, khaolo ea 1, 'me le tla e bona. Le a bona? Joale, mono.

³⁶ Eaba O romela Evangelia ea Oona 'me oa E jala, oa theola Moea oa Oona ho E phelisa. Joale, tse peli li tla mela tšimong e le 'ngoe, Baheberu 6 e re bolella hoo, "Pula e theohelang hangata," Jesu o boletse, "holim'a lefatše," 'me mono le a elelloa, "ho lokisa, ho apesa lefatše; haele meutloa le libajoa, tse seng li tla latoloa, tsona pheletso ea tsona ke ho chesoa." Le e fumane? Joale hopolang.

³⁷ Re tla nka tšimo ea koro. Lona batho ba lemang koro mona. 'Me e—e komello ke ena e fihla. Mona ho fumanoa limela tse hloang kapa mahola ao le a fumanang mona, lehola le tsejoang le melang tšimong; limela tse hloang naheng, mahola a lebese lebiling... tšimong, meutloa naheng. 'Me le koro e tšimong. Bobeli li nyoriloe. 'Me pula ha e tele mofoka, empa e tlela koro, empa mofokanyana oo o tla ema tsoee 'me o thabe hakaalo ka koro ha e ka thaba.

³⁸ Empa u tsebjoa ka litholoana tsa hau. Oona Moea o theohelang holim'a moikaketsi 'me o a hoeletsa o itšoara joaloka ba bang bohole, empa bophelo ba hae ke bona bo pakang seo a leng sona. Le a bona? 'Me re itšetlehile haholo ka maikutlo. 'Me kajeno tšimo e tletse mefuta eohle ea maikutlo, mofuta o mong le o mong oa maikutlo a sa khemeng le Mangolo le ntho efe ese. Ka sebele. Empa re tlameha ho khutlela Lentsoeng, 'Nete ea Lentsoe. Lentsoe, seo Le se buileng!

³⁹ Joale, Molimo o bolella Abrahama hore ka eena, selekane sa boraro, le sona feela selekane. Jesu e ne e le thasisetso feela ea selekane seo A se entseng le Abrahama, Peō ea borena, Peō ea Moea.

⁴⁰ 'Me ho lona metsoalle ea ka e ratehang ea Katolike, ha le re, "Ahe, Maria, 'm'a Molimo," ha le soabe na? Maria e ne e ka ba 'mè oa Molimo joang? O ne a ka sitoa. U re, be . . .

⁴¹ Ke ne ke qoqa le motho ka tsatsi le leng, ba fapane. Ba boletse hore—hore Jesu e ne e le e—e peo ea—ea Maria. Haeba E ne e le peo ea Maria; pele peo e ka theoha ka tšupu, maikutlo a ne a loketse ho futha ho e tlisa. Joale u ntse u etsa Jehova . . . Na u bona seo u Mo etsisang sona?

⁴² Molimo, 'Mopi, o bopile lehe le sele ea Mali 'moho, le ho hlahisa Tabernakele. 'Me motho ha a ka a amana le Eona ka letho! E ne e le Molimo feela! Ke hantle.

⁴³ E ne e le mosali ea lokileng, ruri. Ho na le ba bangata ba lokileng ba lutseng mona bosiung bona. 'Me ha Molimo o qeta ho sebelisa ntho efe, e tlohile temeng. 'Me ha se moemeli. Ha se 'mè oa Molimo. Ke mosali ea lokileng, ea halalelang ea leng Khanyeng, hoba o sebelitse morero oa Molimo. 'Me mosali e mong le e mong ka mona o na le monyetla o tšoanang, mohlomong e seng ka ho tšoana, empa ho sebeletsa Molimo. Le a bona? Molimo o tla u sebelisa.

⁴⁴ Oa mpa oa mo sebelisa joaloka seqhotsisi, empa Ngoana e ne e le oa Molimo. Yaa, E ne e le 'Mopi oa lehe le hemotlelobini. 'Me hemotlelobini, ehlile, e tsoa ho bong bo botona; 'me E ne e le 'Mopi oa seo. 'Me Maria o hlahisitse lesea lena maikutlo a le sieo, haese ho khurumetsoa ke Moea o Halalelang feela le ho bopa ka popelong ea hae sele ena ea Mali le lehe le hlahisitseng Monna, Kreste Jesu.

⁴⁵ 'Me seo e ne e le selekane seo Molimo o neng o ngola ka sona, mohla Molimo o neng o etsoa motho hara rona, eaba O a haholoa. Le a bona, na le bona boraro ba tsona, tse lilemo li tharo, tsa ntoo khekhethoa. 'Me Molimo a isa karolo e le 'ngoe ea Eona Hae le Eena, le ho romela karolo e 'ngoe tlase mona. Joale mohla 'Mele o boelang o kopana hape, e ka khona e be bona Bophelo bo laotseng 'Mele oo e ka khona e be bona Bophelo bo laolang 'Mele ona. 'Me E ne e le Lentsoe. 'Me Eena ke Lentsoe! Le a bona? 'Me mesebetsi eo Lentsoe le e entseng mohlang oo e etsoa kajeno.

Ke Lentsoe, Lentsoe la Bosafeleng. 'Me Lentsoe la Molimo ke Bosafeleng. Ho lokile.

⁴⁶ Joale O ne a etsa'ng? Ho etsa tsela, ho bontša, ho tseba hobane Iseraele, peo ea hlaho, e ne e tla Mo latola; empa ho tseba hobane Peo ea borena, e sa tsoang kopanong ea bong le Sara, empa ho tsoa tumelong eo Abrahama a bileng le eona, e hlahisitseng Kreste, eo ke eona Peo ea borena ea lichaba tsohle, motsoako, Monyaluo ea tsoang lichabeng tsohle. Abrahama, ntat'a lichaba, eseng hobane a ne a e-na le... a phetse le Sara mosali oa hae, 'me a tsoala mora, empa kahobane a lumetse Lentsoe. Amen. Ke eona.

⁴⁷ Joale rea fumana, kamora sena, boiphihlelo bona bo boholo. Joale re fihla koana khaolong ea 17. Re tla leka ho fumana ea 22, ha ho khonahala. Khaolo ea 17. Na le rata leeto leo 'moho le Abrahama? Ke rata ho e shebella feela. Hobane hobaneng? Ntho e 'ngoe le e 'ngoe eo a e entseng e ne e le papiso e phethahetseng ea Kereke. Na le lumela seo? Lemohang, Mangolo 'ohle a e bapisa.

⁴⁸ Shebang Joele, o itse, "Matsatsing a bofelo, Molimo o tla tšela Moea oa Hae." Kamoo ho neng ho tla fihla lerutlè 'me la ja kereke ea Hae! "Se siiloeng ke seongoane, lerutle; le seongoane, bookholane." 'Me ke kokoanyana e le 'ngoe, kokoanyana e le 'ngoe ka mekhahlelo e mene e fapaneng. E 'ngoe le e 'ngoe e ja karolo. Mona ho fihla bookholane ba khale kapa seongoane se ja lekhapetla, 'me e 'ngoe e ja tholoana, 'me—'me ho ntoo latela tse ling tse se monyang bophelo. Ke mohla . . .

⁴⁹ Kreste, Sefate seo se neng se le tšimong ea Edene! Lifate li ne li le peli tšimong ea Edene. Lifate tsena tse peli li ne li behiloe moo ka morero oa tsoalo. 'Me eitseha... Eva, e ne e le sefate sa lefu haeba a ne a ka angoa. 'Me Kreste e ne e le Sefate sa Bophelo. Joale ka mosali ho fihla lefu; ka Monna ho fihla Bophelo.

⁵⁰ Joale mohla A neng a eme mona a bua le Bajuda, O itse, "Ke... ba lona..."

⁵¹ Ba itse, "Bontata rona ba jele manna feelleng ka lilemo tse mashome a mane."

⁵² A re, "'Me bao, e mong le e mong, ba shoe! Empa Ke 'na Bohobe ba Bophelo, Sefate sa Bophelo, se tsoang ho Molimo Leholimong, ekareha motho a ejah Bohobe bona 'me a ke ke a shoa le ka mohla o le mong."

⁵³ Molimo oa beha Lirafime mono, li lebela Sefate seo, ho se be motho ea Se amang. Joale O ntšitse Lirafime, ho leka ho ba khutlisetsa kahara Sefate. Mohlang oo, ba bone pono, ba ne ba batla ho ea Sefateng, ho khutla kantle ho pheko. Empa joale hoba pheko e etsoe, liabolosi o a ba foufatsa, ho ba faposetsa ka mona hole le Sefate. Hlokamelang.

⁵⁴ Mohla Kreste a neng a fihla lefatšeng, E ne e le Sefate sa Molimo se phethahetseng. Davida o 'Mone ho Pesalema ea 1, o

itse, "Sefate se lenngoeng pela noka, linoka tsa metsi." Linoka tse ngata, Metsi a le mang; lineo tse ngata, Moea o le mong. "Mahlaku a Hae a ke ke a foforeha."

⁵⁵ Empa mohla A neng a fihla lefatšeng, ho etsahetseng? Matla a Roma a khethutse sefate seo 'me a Mo fanyeha sefateng se betliloeng ke motho. Eaba Molimo o tsosa Sefate seo 'me oa Se beha ka letsohong le letona, le ho khutlisa Moea ho Mo etsetsa Monyaluoa, joalokaha Adama a ne a loketse tšimong ea Edene. 'Me eitseha sefate seo se qala, e ne e le sefate sa pentekosta.

⁵⁶ Re utloa mopapa a re, "Likereke tsohle, khutlelang ho 'mè kereke, ho ea qalong. Khutlelang Roma!"

⁵⁷ Ke batla rahistori a le mong, moreri a le mong, kapa motho ea emang, ho ncheba sefahlehong le ho mpontša hore kereke e qala Roma. Kereke e qala Jerusalema ka Letsatsi la Pentekonta! Ke hona moo. Mokhatlo o qala Roma, lilemo tse makholo a mararo le ho hong hamorao. Empa Kereke e qala mane Pentekosta; Molimo o hlahisetsa sefate sa Monyaluoa bakeng sa Kreste, ka Moea o tšoanang le o neng o le ka ho Kreste, ho hlahisa sefate sa Monyaluoa. 'Me ha etsahala'ng? Eitseha e qala e feheloa, e hola, kokoanyana ea Roma ea se pharumela 'me ea qala ea se khethula. Se siiloeng ke bookholane, seongoane se se jele, sa ba sa fihla koana kutung.

⁵⁸ Empa Molimo o itse, "Ke tla khutlisetsa, ho bolela Morena." Sefate seo se tla hlaha hape, hoba Sefate sa Monyaluoa se tla kamorao ho Monyaluoa.

Ho tlie Luthere, O entse'ng? Ho sala tokafatso morao.

⁵⁹ Kereke e kena ka mokhoa oo hantle, Johanne a ntse a rera tokafatso. Ha kena Kreste, a ntse a rera khalaletso. Seheberu... Ke bolela Santa Johanne 17:17, "Ba halaletse ka 'Nete, Ntate. Lentsoe la Hau ke 'Nete." 'Me E ne e le Lentsoe. Ke hantle. E ne e le Sehlabelo. Hape, ka Letsatsi la Pentekosta, ka Moea o Halalelang. Tokafatso; khalaletso; 'me mohla sefate se neng se amohela kolobetso ea Moea o Halalelang, e ne e le sefate se tletseng sa Monyaluoa!

⁶⁰ Baroma ba se jele ba se qeta. Kamoo se theohileng feela, se nyolohile! 'Me eareha se qala se hlaha ka Luthere, eng? Ka mora lefu la Luthere, ba se hlophisa. Molemi a etsa'ng? Ho hlaola makala a khale a shoeleng.

⁶¹ Sa tloha, ho ea pejana, pelo ea sefate e entse e hola. Ke sefate se reriloeng pele! Peo eo e robetse mono, e loketse ho tla! 'Me ea nyoloha hape, 'me Wesley a qala. 'Me ba ne ba makhlile tsoselotso e kholo tlasa khalaletso. Ho etsahetse'ng? A boela a se hlaola, mohla ba neng ba hlophisa. Ha ho mohla mokhatlo o kileng oa tsoha le ka mohla. Ha ho le o mong o kileng oa oa oa boela oa khutla hape.

⁶² Eaba ho latela Mapentekosta, ka khutlisetsa ea lineo. E entse'ng? Ea hlophisa! Molimo oa etsa'ng? Ho e hlalola!

⁶³ Empa O itseng? "Ke tla khutlisetsa, ho bolela Morena." O tla ntša mahlekeng ao, Kereke e hlatsoitsoeng ka Mali, e rekiloeng ka Bibele, le ea Lentsoe le tiileng, Monyaluo! Maseli a mantsiboea a hlahla. Tholoana e butsoa kae? Hantle hlorong ea sefate. Ke 'na enoa ke tloha hape!

⁶⁴ Morao ho Abrahama, morao, ha re eeng ho Abrahama. Ke enoa A fihla, ho kena Peo ea borena ea nako ea mantsiboea. Lichaba . . . Hlokamelang joale kamora khaolo ea 17, re fumana mona khaolong ea 17, Molimo o hlahile ho Abrahama ka Lebitso la Molimo o Matlaohle.

⁶⁵ Abrahama o ne a le lilemo tse mashome a robong le metso e robong, 'me nako ena eohle a eso sisinyehe, o mpa a lumetse Lentsoe la Molimo; le ho bitsa lintho tse neng li le sieo eka hoja li ne li le teng, hoba Molimo o itsalo, a ntse a lumela hoba lesea leo le tla fihla, ho tiisetsa tšepisong. Monna ea mokakang! Moena ea mokakang! "Abrahama, mohla tšepo e leng sieo . . ." Popelo ea Sara e ne e shoele. E ne e le nyopa. 'Mele oa tona o se o shoele. Bibele e o tlalehile joalo, 'mele oa tona o se o ichoeletse. 'Me popelo ea Sara e ne e shoele. 'Me joale a se a nanarela lilemo tse mashome a mane ka morao ho menophose, 'me le joale Abrahama o e lumetse, hore o tla fumana lesea kaha Molimo o boletse joalo. Ke lona bao. Ho tiisetsa Lentsoeng hoba Molimo o boletse! Ho sa tsotelle eng, litumeloana tse Le pupelitseng, 'me, le joale Lentsoe leo le ne le robetse mono! Le ne le tlamehile ho fihla. 'Me Lentsoe leo le ne le lutse pelong ea Abrahama!

⁶⁶ Ho sa tsotelle bongata bo reng, "Matsatsi a *sena* a fetile, le *seo* mono." Haeba Lentsoe leo le lutse mono, le tla bopa, hoba ke Lentsoe le melisitsoeng. Hoba, Molimo ke Lentsoe, 'me Bophelo ba Molimo bo ka har'a Lentsoe. Hlokamelang joale ha Lentsoe leo le theohela ka hare ho Bophelo ba Molimo, ntho e a hlahla, e a etsahala. Joale hlokamelang.

⁶⁷ Eaba O mo hlahela ka Lebitso la Molimo o Matlaohle. Joale, Molimo o ne o tšoere mabitso a supileng a menahaneng a topollo. 'Me mona Oa mo hlahela ka sebopaho sa Molimo o Matlaohle, ho bolelang "El Shaddai." Ho . . . "Shaddai," ka Seheberu. *El* e bolela "ea matla." *Shad* e bolela "letsoele;" joaloka letsoele la mosali. 'Me joale sebakeng sa hore e be "shad," bonngoeng; "Shaddai," bongateng. Joale ke matšeliso a makakang ho monnamoholo, oa lilemo tse lekholo, ea tiiselitseng Lentsoe la Molimo pelong ea hae, 'me ke mona Puo ea Molimo e a mo tlela 'me ea re, "Ke 'na El Shaddai. Ke 'na Molimo-ea-Matsoele."

⁶⁸ Oh, re na le matšeliso a makaakang! Joale, ha se, hopolang, ha se feels "letsoele," empa "matsoele"! "O hlabetsoe littolo tsa rona; re folisitsoe ka maqeba a Hae."

⁶⁹ Joale, 'mè o etsa'ng, ka leseanyana la hae, ha le kula le tserema? O phahamisa mothoana eo. O mo phahamisetsa sefubeng sa hae, 'me o . . . le anya matla a 'mè 'meleng oa hae ka letsoele. Ebile ha a khotsofala feela kapa o a . . . O khutsitse. O hoelelitse ka lentsoe la hae le phahameng, o ferekane ka botlalo; empa ha 'mè a mo phahamisa 'me a 'mea . . . ho mo bea sefubeng sa hae, le ho qala a mo binela, ho kolokotehisa morao le pele, o phopholetsa 'mae, hlooho ea hae e sefubeng sa hae, 'me o a qala o anya a momona matla ho 'mae, ho kena 'meleng oa hae. O ntse a inchafatsa, a ipha matla; hape o khotsofetse, nakong eo letsatsi le letsatsi a ntseng a ipha matla.

⁷⁰ Boiphihlelo bo bokaakang ho Peō ea Abrahama! E sa ntse e le Molimo ea Matlaohle, El Shaddai! Re ka tšoara tšepiso efe eo O e entseng ka Bibeleng. Peo ea Hae, bana ba Hae, ha u kula, tšoara feela sefuba sa tšepiso sa Lentsoe le itseng, "Re folisitsoe ka maqeba a Hae." E a khotsofatsa! 'Me ha re phetse ho momona, matla a rona, ho tsoa ho Ea matla, El, Ea matla, Mohlolehi, ho momona Bophelo ba Hae ho Eena, ka tšepiso ea Hae.

⁷¹ Ke maikutlo a makakang ho motho ea robetseng sefubeng sa El Shaddai, ho lumela, ho tseba hobane re anya matla a Kreste, a tsoang tšepisong ea Hae, ka ho rona!

⁷² Mohla El Shaddai a neng a tšetlehile Abrahama sefubeng sa Hae, lilemo tse mashome a mabeli a metso e mehlano pele ho moo; monna oa leqheku, la lilemo tse mashome a supileng a metso e mehlano, le mosali oa hae a le mashome a tšeletseng a metso e mehlano; ha a tlohela Letsoele leo. O haotse hantle a parola naheng esele, har'a batho ba basele ba sa tsebeng Molimo, empa a 'na a paka kamehla, a tiea tumelong, ho lebisa thoriso ho Molimo, hoba a itsebile a momona tšepisong eo.

⁷³ Ke tšepo e kakang ho kereke bosiung bona, horeng ea lefifi, litumela-khoela, maikutlo, bohlalefi. Moea o Halalelang o boletse, "Matsatsing a bofelo ho tla hlaha kereke ea bohlalefi. Moea o bua o omela," Timothea oa Pele 3, "mehleng ea morao ba bang ba tla koenehela Tumelo, ba tla inehela meeā e bolotsana, le lithuto tsa batemona," ehlile, "ba nang le sebopaho sa borapeli." Ba ne ba etsa'ng? "Bahalefi, baikhohomosi." Ngaka Ph.D., LL.D., QST, lithaetlele tsena tsohle. "Khele, Ngaka *Sekete-kete*, atisa ka *hore-le-hore*, ke molisa oa rona."

⁷⁴ Nka mpa ka memela lelapa la ka monna, kapa ngoana oa ka, ea sa tsebeng ho khetha linaoa tse patsotsoeng le kofi, ba mpa ba tseba Kreste! Ke hantle. Ho mo ntšetsa kantle nqa e 'ngoe pel'a kutu ea khale le ho khumama ka mangole le ho rapela le eena ho fihlela Moea o Halalelang u kena ho eena. Nka mpa ka fumana hoo sebakeng sa saekholoji eohle eo le ka e tumuletsang ka ho ho eena ka lengolo la bongaka. Ho 'molella Lentsoe la Molimo! E.

⁷⁵ “Empa ba manganga, ba ikhohomosi, ba ratang menate ea nama ho feta ho rata Molimo, ba se nang ho tšepeha, baetseletsi, ba sa khoneng ho itšoara, le ba hloeang ba molemo.”

⁷⁶ Oh, u re, “Ao ke Makomonisi.” Che, che! Ke bao ho thoeng ke Bakreste.

⁷⁷ “Ba nang le seboleho sa borapeli, ba mpa ba latola Matla a jona, le ba joalo u ba furalle. Ona ke mofuta o kenang ntlu le ntlu, ba hapang basajana, ba imetsoeng ke litakatso tse ngata, le ka mohla ha ba finyelle tsebong ea ’nete.” Ke hantle. Ke eona taba. ’Me re bona letsatsi leo.

⁷⁸ ‘Me ke matšeliso a makakang ho molumeli, ho ikhetha ho se lumeleng hohle, litumeloana tsohle tsa bona tse hlokang borapeli, lithuto tsohle tsa bona tse hlokang borapeli, le ho talima ho Kreste ka kotloloho le ho nka Lentsoe, le ho tiisetsa Lentsoe leo ho fihlela u Le bona le bonahatsoa. Ho sa tsotellehe u lokela ho ema hakae, lula mono! Molimo u e tsepisitse. O u tataisitse ho eona, e tiisetse! Lula mono. U se ke ua e khutlisa. Lula hantle moo. Haeba u kholisehile ka eona, u tla lula mono. Empa haeba u tsokotseha, u tla e fuparollela lethoana lefe. Tšoene e phamola linthoana tse benyang, empa bere e tiisa phuparo ea eona. Kahoo, u lule joalo! E, tiisetsa, fuparela hantle!

⁷⁹ El Shaddai! O itse, “Ke ’Na El Shaddai. Abrahama, ke ’Na Ea matla. U leqheku la monna. U se u le lilemo tse lekholo joale, matla a hau a felile; empa ke ’Na Matla a hau! Tšepo ea hau e felile; empa ke ’Na Tšepo ea hau!”

⁸⁰ Oh, uena ea leng mahlomoleng, bosiung bona, kantle mona ka mofetše le lintho, na ha u bone moo Matla a hau a tsoang teng? Ha se thipa ea ngaka, empa ho tsoa Lentsoeng la Molimo! “Ke ’na Kabelo ea hau! Ke ’na Matla a hau! O anya matla a hau ho ’Na!”

⁸¹ Ha se ho nyemotsa ngaka ea lithipa joale; o etsa karolo ea hae ho ho eena. Empa Molimo ke Mofolisi. Ha ho ngaka ea lithipa, ha ho ngaka, ha ho moriana o kileng oa folisa. Che, monghali, ha ba na moriana le o mong o ka folisang. Joale, ngaka efe feela e tla u borella seo. Ba thusa, empa Molimo ke Mofolisi. Ba ka tabola letsoho la hau, empa Molimo o tlameha ho le folisa. Ha ba na letho ho haha lithishu; holane ba ka khona, ba ka bopa motho. Ka baka leo, le a bona, Molimo ke Mofolisi. U ka matahanya lesapo hantle, empa Molimo u tlameha ho le folisa. Molimo ke Mofolisi, “Ke ’na Jehova ea folisang maloetse ’ohle a lona.” ’Me u ke ke oa buisa Lentsoe la Molimo leshano; Le tla khutlala hantle ’neteng nako le nako, ka kotloloho hantle feela morao. U ke ke oa Le buisa leshano.

⁸² Joale ba re Bibebe e a Itoantša. Ke botsitse, le ho borella banna nka ba nehela moputso oa selemo tšimong, ha nka khona, sohle seo nka se etsang, ho mpontša lentsoe le le leng ka Bibeleng

le leanang le le leng. Ke hantle. Ha le eo mono. Ke lebaka la kelello ea hau ea nama e le shebang ka mokhoa oa eona. Moea o Halalelang ke Toloko ea Lentsoe leo. Lentsoe leo ke 'nete, le hlophisitsoe 'moho. Lohle le lutse mono joaloka selotho sa malataliana, empa ho hlokoa Moea o Halalelang ho Le kopanya, ho Le fetola setšoantšo sa topolla ea Molimo le mahlohonolo a Hae ho batho ba Hae. Amen. Ha e Itoantše! Ha ho Lengolo le le leng, ha ho temana e le 'ngoe ea Lona, e hananang le e 'ngoe. Haeba e le teng, ha e lokeloe ke pampiri eo e ngotsoeng ho eona, e a thetsa. Molimo ha u leshano. Molimo ke 'nete, o lokile, o a halalela, o a tsepahala. Ke Molimo.

⁸³ Joale, eitseha Abrahama a fumana lentsoe lena, ho re "Ke 'na El Shaddai. Ke Moaba-Matla oa hau! Mosali oa hau, popelo ea hae e se e omeletse, o fetile menophose ka lilemo tse mashome a mane, 'mele oa hau o se o ichoeletse; empa Ke El Shaddai." O sa tsoa tlisa Ishmaele, le a tseba; empa O itse, "Eo ha se eena. Che, e tla ba monna e moholo. O tla tsoala mahosi a mangata. Empa eo Ke entseng tsepiso le eena, o lipakeng tsa hau le Sara." Ke eona! Amen. Abrahama a ikutloa a thabile kannete.

⁸⁴ A re, "Joale ke batla ho u bolella taba, Abrahama. Ke tla fetola lebitso la hau." A re, "Ha u sa tla bitsoa Abrame, empa Abrahama." Abrame e bolela "ea phahameng—ntate ea phahameng." Empa Abrahama e bolela "ntata lichaba." "Me ha e sa tla ba S-a-r-a-i; ke S-a-r-a-h, Sarah, "khosatsana." Ho fetoloa lebitso la bona! Ha se le e—e phetoho ea lebitso eo! Ntho e etsahetse hobane ba a . . . Le a bona, phetoho e loketse ho hlaha pele lintho li etsahala. A ke ke a ba fa ngoana ha feela lebitso la bona le le joalo.

⁸⁵ 'Me u ke ke oa tsoaloa labobeli ha feela lebitso la hau le sa ngoloa Bukeng ea Leholimo. U ka le ngola holim'a kereke e 'ngoe le e 'ngoe, Methodise, Baptise, Presbeteriene, ho le jara ho tloha sebakeng se seng ho ea ho se seng, ho ngmgisana le bona bohole; empa le tla lokela ho ngoloa Bukeng ea Leholimo pele ntho efe e ka etsahala, 'me popo e ncha e ka fihla. Pele bophelo bo bocha bo ka fihla, mabitso a bona a ne a tlameha ho fetoloa. U ka tlameha ho fetola la hau, le uena, ho le hlakola libukeng tsena tse entsoeng ke batho, ho isoa ho Libuka tsa Leholimo.

⁸⁶ "Hona mono, lebitso la hau ha e sa le Abrame, 'ntate ea phahameng'; empa ke Abrahama, 'ntata lichaba.' Ha e sa le (Sara), Sarai, empa Sara, "khosatsana."

⁸⁷ Oh, ke rona bana joale re fetela khaolong ea 18. Ho tloha ho ea 17, ha re eeng ka kotloloho ho ea 18, hobane ke feela . . . Ha ke batle ho suthela hole le eona haholo bosius, ho le lulisa mona, hoba ke batla le khutle hosane bosiu. Joale hlokomelang. 'Me re tla fihla, ka potlako eo re ka e khonang, ho ea 22. Shebang joale. Ha fihla tsatsi le leng, nkare, ha re re, matsatsi a mabeli

kapa a mararo ka morao ho moo, Abrahama le Sara, litente tsa bona li ne li thakhisitsoe.

⁸⁸ Tlase koana toropong, ke a kholoa Mof. Lota o ne a apara mese eohle ea ditaele tse ncha tseo ba neng ba li tšoere tlase mono. 'Me o ne a hlophisa mekhabo eohle ea meriri tsohle tseo ba neng ba li tšoere. O ne a phela bophelo ba boiketlo, 'me le barali ba hae bohole a ba etsisitse ka ho tšoana. Ka mokhoa o tšoanang 'mè oa khale seotsoa kajeno, o etsisitse barali ba hae bohole ntho e tšoanang.

⁸⁹ Joale, empa Sara, leha e le mosali e motle ka ho fetisisa naheng eohle, o ne a lutse naheng e moketa, hobane o ne a khomaretse ea tšoereng tšepiso. Joale ke mpe ke e tlohele hantle mona, hobane ke tla ea, ke tla... Ke tla le lulisa mona ho fihlela khitla ea bosiu. A tiisettsa ho Abrahama. Ke hantle. O ne a tšoere tšepiso.

⁹⁰ Itšoarelle ho Kreste, Ke Eena ea tšoereng tšepiso! Ke Tšepiso. Ke Tšepiso! Hlokombelang.

⁹¹ Tsatsi le leng letsatsi la chaba le chesa haholo hoseng ho hong, Abrahama a lutse kantle moriting oa tente ea hae mono pel'a sefate sa eike. 'Me a sheba fatše, ekaba hora ea leshome le motso o mong, 'me a bona monna ba le bararo ba etla, ba nyoloha, liaparo tsa bona li tletse lerole. 'Me Abrahama a titima a tsoa. Ntho e ka pelong ea hae ea mo thabisa, 'me a matha a tsoa a itihela fatše maotong a bona. 'Me bonang, o itse, "Morena oa ka!" Na ha ho makatse? Ba bararo ba bona; empa "Moren'a ka"!

⁹² Shebang Lota. Eitseha ba babeli ba bona ba theohela mono, ba babeli feela ba bona, o itse, "Beng ba ka." Lota a ba bitsa "beng." Abrahama... Lota o bitsitse, ba babeli, "beng."

⁹³ 'Me Abrahama o bitsitse, ba bararo ba bona, "Morena! Morena oa ka!" Amen! Oh, nako e atametse! Hlokombelang, o itse, "Morena oa ka, haeba ke fumane mohau mahlong a Hau, tloo, u lule tlas'a sefate sa eike. Nke ke tšelete metsana, 'me ke hlatsoe maoto a Hau, 'me ke tlise senkhoa sa bohobe. Hoba U tlide mona ka morero oo feela, ho tla mpona." Ba tloha ba atamela.

⁹⁴ A tsoa a feta le ka morao ho tente, a re, "Sara, luba phoofo kapele, 'me u apehe likuku holim'a leifo." A tsoa a tšoara namane, 'me a e hlaba a e lokisa, 'me a khabela maqa, a tlisa sereleli le lebese, le—le ho li bea pel'a monna eo, 'me ba ja.

⁹⁵ 'Me e Mong oa bona e ne e le Molimo ka Seqo! Ke seo Bibele e se boletseng. Joale ha u batla ho pheha khang Eona, qhoba. A 'Mitsa "Elohim, Molimo." O loketse ho tseba; o ne a bua le Eena. Hlokombelang, "Morena Molimo!" Joale, e Mong oa bona e ne e le Molimo. 'Me a Mo talima. Abrahama o e lemohile. Joale shebang mono.

⁹⁶ Moreri o mpoleletse khetlo le leng, a re, “Moena Branham, ha u batle ho mpolella hore u lumela hoo, hore Monna eo e ne e le Molimo?”

⁹⁷ Ka re, “Abrahama o itse E ne e le eena. Bafetoleli bohle ba e fetoletse ka ho tšoana, M-o-r-e-n-a ka tlhaku e kholo. ’Me mang ea balang Bibebe u a tseba hore M-o-r-e-n-a ka tlhaku e kholo ke Elohim. E tsoa lentsoeng lona leo, Elohim! ‘Tšimolohong, tšimolohong, Molimo o hlotse,’ Elohim, Ea Matlaohle, Ea leng teng ka boeena, ‘u hlotse Maholimo le lefatše.’ Ke Eo hape, ho ema ka pel’ a hae hantle.”

A re, “Be, u a tseba,” ho re, “eo—eo e ne e le monna feela.”

⁹⁸ Ka re, “Ehlile, O jele nama, O jele, O noelege lebese, ’me A—’me A—’me O jele bohobe.” Ka re, “Ehlile, E ne e le Molimo.”

A re, “Ho ne ho ka ba joalo joang?”

Ka re, “Mong’ a ka, u—u . . .”

⁹⁹ Ke—ke a tšepa ha li thonkhe maikutlo a lona; e ne e le Lipaki tsa Jehova. ’Me a re ho ’na, a re, “Be, Mongh. Branham, sheba mona, ke batla ho u bolella taba. Molimo o ne o ke ke oa etsa seo.”

¹⁰⁰ Ka re, “U mpa u sa tsebe Molimo oa ka feela. Ke phetho.” Ka re, “Mele oa motho o entsoe ka eng? Petroleamo, potashe, le leseli la k’hosmiki, lielemente tse leshome le metso e tšeletseng. Ntho feela eo Molimo o neng o tlameha ho e etsa ho theoha le ho hlahloba Sodoma, O itse . . . oa mpa oa nanabela ’me Oa ingoathela seatla se tletseng leseli la k’hosmiki le petroliamo, le ‘Whew!’ Ho re, ‘Tloo koano, Gabriele, hata u kene ka mona.’ Ke hantle. Ho nanabela le ho ikhella lerōjana le leng le tlalang seatla, ‘Tloo koano, Mikaele, hata u kene ka mona.’ Le ho Iketsetsa o mong.” O ne a tlamehile ho bapisa ntho eo A neng a tla e etsa matsatsing a qetelo, ka hona O theoha hantle le ho bua a le nameng ea motho. Hantle haholo. Oh, ke thabile haholo haele moo E le oa mofuta oo!

¹⁰¹ Ka tsatsi le leng ho ka tšoha ho sa sala letho ho ’na. Ke bopiloe ka tsona lielemente tse leshome le metso e tšeletseng, le hona. Ke ne ke kama meriri e mebeli kapa e meraro, tsatsi le leng. Mohatsa ka a ncbeba, ’me a re, “Billy, u phumuha lefatla.”

Ka re, “Moratuo, ha kea lahleheloa le ke o le mong oa eona.”

A re, “U kile oa ba moriri o mangetse.”

Ka re, “Yaa, empa ha kea lahleheloa le ke o le mong oa eona.”

A re, “Ke a rapela mpolelle moo e leng teng.”

¹⁰² Ka re, “Ka hona, moratuo, mpolelle moo e tsoang teng pele ke e fumana. ’Me hohle moo e neng e le teng pele ke e fumana, e hona mono e nkemetse ho fihla ho eona.”

¹⁰³ Amen! Khanya! Bibebe e boletse, “Le moriri o le mong oa lihlooho tsa lōna o ke ke oa timela!” Alleluia! Ke hantle feela. O ne o le sieo, athe o teng; athe ha o eo, o ntoo ba teng.

Ka sebele. Ehlile! Petroleamo, leseli la k'hosmiki, k'halsiamo, potashe, joalo-joalo. Molimo . . . Atha ha ke letho, ha u bone letho, haese molora feela, O tla bua, allelua, ho tsoaka potashe eo le petroliamo 'moho, 'me ke tla phela hape ka pel'a Sefahleho sa Hae. Allelua! O re fa Bophelo Bosafeleng. Amen. "Sohle seo Ntate a 'Neileng sona, ha ho letho le lahlehileng, 'me Ke tla mo tsosa hape matsatsing a qetelo." Ke a e lumela! Joaloka Peō ea Abrahama, ke emetse letsatsi leo! Ke batla Motse oo Mohahi le Moetsi oa oona E leng Molimo. Amen. Ka sebele. Ho sa tsotelehe kamoo sena se sosobanang 'me se huleha, 'me moriri u foforeh, ho sa tsotelehe se etsahalang, Molimo o tla o tsosa hape, ka phatsimo ea bocha hape, tsatsing leo la ho qetela. O tsepisitse hore O tla e etsa, 'me ke batlana le Motse oo! Amen. Oh, khili! Ke ikutloa ke tletse borapeli hona joale, ho tseba, 'me tsepoe eo e bokoang e nkemetse Mono. Ke batla Motse oo. Pelo ea ka e a otla e habile ho Oona. Oh, nke ke ka fapoha ka tsela ese, empa ho sheba ka kotloloho Nqalong eo. Molimo, nthuse ho lula hantle mono, ka 'nete le ka botšepehi, ho lahlela thapo ea pholoso, hohle, le ho tlisa moeti e mong le e mong ea khathetseng eo nka mo khonang, ho tsamaea 'moho.

¹⁰⁴ E, ke bone pono ea eona nakoana e fetileng, le ho e bona, 'me ka bona baratuo ba heso mono, ba khutletse bocheng hape. E teng mono. E teng mono. Kea tseba hore e teng mono! E, monghali! Joale, mohlomong le e balile ho Christian Business Men's Voice, le limakasine tse ngata le lintho tse neng li e ngotse. Metsoalle, eo e ne e se pono. Ke bone lipono, ke a tseba, ke loketse ho tseba seo li se tšoereng, tseo A mphileng tsona ka mashome a likete. Empa ena e ne e se pono. Ke ne ke le teng mono, ke eme hantle mono, ke hetlile morao. 'Me kea tseba hore e teng mono. E teng mono, metsoalle, e teng mono! Kea tseba hore e teng mono! E monghali! Ruri joalokaha ke eme mona, ka hona nthuse, haeba kelello ea ka e hlaphohetsoe 'me ke eme mona sefaleng sena, e teng mono! Molimo o entse tšepiso ea Hae, 'me ke 'nete, ke 'nete hona! E, monghali. E teng mono. Hlokamelang.

¹⁰⁵ Joale re a fumana, banna bana ba lula fatše 'me ba ja. 'Me ba babeli ba bona ba ema 'me ba theohela Sodoma. E mong a sala le Abrahama. Ha re shebeng puisano ea bona. Ba sa phetse ho sheba nqa Sodoma. 'Me Abrahama o tsebile ntho e makatsang e le teng ka seo. Ka hona A re, eareha A itokisetsa ho tloha, A re, "Na le hopola Ke loketse ho patela Abrahama; haele moo e tla ba ntata lichaba, ke tseba kamoo a tla holisa bana ba hae, joalo-joalo; seo Ke tlang ho se etsa?" A re, "Libe tsa Sodoma li mahlonoko ebile li fihlile litsebeng tsa Hae." O theohile ho tla fuputsa.

¹⁰⁶ Joale hopolang, joalekaha ke boletse bosius bo bong, ba babeli ba manqosa ao ba theohetse Sodoma, 'me ba rerela Basodoma bao; 'me ba ba foufatsa bosius boo, Lentsoeng.

Empa, hopolang, E Mong o ne a le teng; bona, ba ne ba fumane pontšo ea bona, Moeti har'a bona.

¹⁰⁷ Shebang Lota. Lota ea lutseng khorong, le ho re, "Beng ba ka." Le ho phela ka tsela e joalo! Ba itse, "Kena tlung ea ka." A re, "Re tla robala seterateng." Lehae le le kakang!

¹⁰⁸ Empa hang ha Abrahama; ba itse, "Re tlie ka morero ona. Re lula fatše mona pel'a hau."

¹⁰⁹ Ke eona tsela. Phela ka mokhoa oo, haeba Molimo a rata ho u sebelisa, O tseba hantle moo u ka fumanoang teng. U lutse malulong, u phela bophelo bo hloekileng pel'a Molimo, mantsoe a hau a tsepahala, bophelo ba hau ke 'nete. Mangeloi a tla sebakeng se joalo. Shebang ho—ho Elisabetha le Zakaria, le a bona, ba lokileng ba tsepahang, ba tsamaea ka Melao eohle ea Morena. Re batla ho phela ka mokhoa oo, etlereha Molimo o itokiseta ho re sebelisa, O re, "Sena ke sechaba sa Ka. Nka sebetsa ka kereke ena seo Ke se batlang. Ba lumela ho 'Na. Ba ema Lentsoeng la Ka." Le a bona, le batla ho sebetsa joalo, phela bophelo.

¹¹⁰ Joale re fumana Lengeloi lena, Le itse, "Nke ke ka patela Abrahama. Empa Ke tla u etela ho ka nako ea bophelo." 'Me, hlokomalang, ha A ka a 'mitsa Abrame, O 'mitsitse "Abrahama." O tsebile joang hoba lebitso leo le ne le fetotsoe? Ke Eena ea neng a le fetole. Ehlide. Lemohang, ha a bitsa Sarai, le a tseba, S-a-r-a-i. S-a-r-a-h, "Mosali oa hau, Sara u kae?" O tsebile joang hore o ne a nyetse? O tsebile joang hore o na le mosali, 'me lebitso la hae e ne e le Sara?

'Me Abrahama a re, "O ka tenteng ka mora Hau." Mofumahali oa sebele hakakang!

¹¹¹ Kajeno, basali ba sebete hona! E mong... Monna oa bona ha a khone le ho bua. Ba tlameha ho hlalhella kantle mono, a patisitse sikarete letsohong, a apere marikhoa-rikhoana, e le eena ea hehlang tsohle. Morabe oa batho ba khopameng hakakang, eka khona e be moapehi oa sehlooho le mohlatsoi oa botlolo, ntho e 'ngoe le e 'ngoe e sele! Ha a tsoa ka kokoiseng, u tlohela sebaka sa hae sa mosebetsi, ka nepo, joaloka 'mè.

¹¹² Joale re fumana, basali ba ne ba lula motšeо ba itšoere, ba itšoere semafumahali, hloooh ea bona e le eona e entseng liqeto le lintho.

¹¹³ 'Me ha u leka ho bolella monna ho joetsa mosali oa hae; o tla re, "Ke batla hore u utloisise hona joale!" Phuu! Phuu! Ho butsoela mosi ka molomo oa hae, a shebahala joalo, chebeho e nyarosang eo. Ha ke eso bone tse joalo! 'Me le ka inahanelia kantle mono, le ho ema mono ho shebella motho eo, ho lemoha moea oo ka mono, le lintho tseo; 'me mohlomong a bina sehlopheng sa 'mino kerekeng e itseng. Oh, letsatsi le le kakang leo re phelang ho lona! Ha ho makatse re le letsatsing leo! Ke—ke a tšepa le utloisia seo ke se bolelang.

¹¹⁴ Lemohang, e ne e le eo. Sara o ne a le ka tenteng, a lutse ka mono 'me a itšoere hantle. Abrahama a ntse a amohela Mangeloi ana ka mofuthu. Joale, 'me O itse, "Ke tla u etela."

¹¹⁵ 'Me Sara o ne a mametse. 'Me a tšeja a keketeha, a re, "'Na, mosali-moholo, oa leqheku ea kang 'na, 'me le morena oa ka mono o tsofetse, 'me ho thoe re tla boela re thaba joaloka monna le mosali?" 'Me a tšeja.

¹¹⁶ 'Me Lengeloi, le furaletseng ka mokokotlo oa Lona, la re, "Sara o tšehele ke'ng?"

¹¹⁷ Hopolang, eo ebile pontšo ea ho qetela eo Peo ea... kapa Abrahama ka sebele, e leng papiso ea Kereke, e ne e le pontšo ea ho qetela eo a ileng a e fumana. Har'a lipontšo tse ling tsohle tseo a li fumaneng, eo e ne e le ea ho qetela pele Sodoma e timetsoa. Ho joalo? Pontšo ea ho qetela!

¹¹⁸ Mohla Israele, peo e ileng ea latela Abrahama. 'Me Basamaria, bona e ne e le peo e lahliloeng ea lesika le tsoakiloeng, ba ne ba Mo lebeletse, leha ho le joalo; ba itse, "Ntata rona—rōna Jakobo o ne a re nehe seliba sena," mosali a rialo Sikare. Le a bona? "Ntata rona Jakobo, o—o file Josefa seliba sena, mora oa hae, 'me—'me re noele ho sona, 'me a nosa le likamele tsa hae. 'Me U re U na le metsi, a mang a joaloka ao?" Le a bona? 'Me pontšo ea ho qetela eo peo ea Israele, ea hlaho, e ileng ea e amohela, e ne e le pontšo ea mofuta o tšoanang! Shuu! Ha le e bone na? Nahanang motsotso!

¹¹⁹ Pontšo ea ho qetela eo Abrahama ka selekane, pontšo ea ho qetela pele ho kheso ea kereke e fofo, le tšenyeho ea hae, e ne e le pontšo ea ho lemoha mehopolo e ka lipelong le kelellong, Molimo u bonahatsoang nameng ea motho.

¹²⁰ 'Me pontšo ea ho qetela eo e bonoeng ke Israele pele e khaoloa, e ne e le ntho e tšoanang. 'Me ba itse, "Ke Belsebule; senohe."

¹²¹ Joale ke hora! Molimo, lumella sena ho thophothela! Joale ke hora, eo, Peo ea borena ea Abrahama! Lea e tšoara na? Molimo u bonahatsoang nameng ea motho, ho ba fa pontšo ea bona ea ho qetela pele ho timetsoa ba foofo le lephallo leo joaloka ha e entse. Qetela! Bokhabane ba ho qetela ba koeneho ea Lota! E reng taba eo e thophothele motsotsa feela.

¹²² Abrahama, 'ngoe; Peo ea tlhaho ea Abrahama, peli; Peo ea Abrahama ea borena, tharo.

¹²³ Hlokamelang, Molaetsa ha u nkane le ba foofo kantle mono. Ke hokae moo O kileng oa ea ho bona? E rometsoe ho mapentekosta, bakhethoa, ba hutsoeng.

¹²⁴ 'Me joaloka ha Israele e entse mohlang oo, mashome a robong... Shebang palo eo, shebang hore E amohetsoe ke Baiseraele ba bakae. Eitseha nako ea bona ea ho nyolohela mono

e fihla, keha ho le lekholo le mashome a mabeli ho tsoa ho limilione li ka ba 'ne.

¹²⁵ Joale hlokamelang Peo ea borena. Le a bona, e loketse ho tla makhetlo ao a mararo, le a bona, hohle moo u nkang teng. Batho ba Kama, Sema le Jafeta. Peō ea borena ea Abrahama! Abrahama ke eo; peo ea tlhaho; Peo ea borena. Tsohle! Peo ea borena e tla ka Kreste, ka . . . Re tla tsepisong ea Abrahama eo Molimo o mo fileng eona ka Kreste, Peō ea borena. 'Me ena ke Peo ea borena, Kereke ena ea Morena Jesu eo A e busetsang matsatsing a qetelo. Peō ea borena! Hlokamelang, o amohetse pontšo eo! 'Me Peo ea borena ka Seqo ea boletse, mohla A neng a le mona, "Joaloka mehleng ea Lota, ho tla ba joalo ho tleng ha Mora motho." Peo ea borena, Peo ea Abrahama, e bitsitsoeng; Lota le eena, oa ngoanabo, ea fofo, tlase Sodoma; 'me e nt oo ba Mosodoma, lefatše. Kajeno, lefatše; lefatše la likereke; le Peo ea borena. Hantle feela, ba lutse malulo le ntho e 'ngoe le e 'ngoe, hantle feela ho latela taolo. 'Me Molimo, ka tsepiso ea Oona, o theohile hantle, ho bonahatsa eo ntho eo. Amen. Haeba e sa phethahala, ha ke tsebe seo phetheho e leng sona. Ke Lengolo!

¹²⁶ Le fumane ho bua ka lipuo, ho hobela ka Moea. Le fumane maikutlo ana 'ohle ao le bileng le 'na, le bone mehlolo ea pholiso, le—le litulo tsa bakuli, joalo-joalo. Re bone tseo tsohle. Empa mona, pontšo ea ho qetela e entsoeng ke ena e nyoloha joale. Abrahama u bone mefuta eohle ea lintho tseo Molimo o mo etselitseng tsona tseleng, ehlide, empa pontšo ea ho qetela ke ena e fihla, pejana feela mora oa tsepiso a fihla. 'Me joale Peo ea borena e emetse Mora oa tsepiso. Alleluia! Na rona, na re shebeletse Mora oa tsepiso? Mora oa Molimo ho khutla! Alleluia! Oh, seo se etsa hore ke batle ho hoeletsa. Bonang! Peō ea borena e shebeletse Mora oa tsepiso. Joalokaha Abrahama a entse ho theosa le lilemo, a ntse a shebile, a tiiselitse Lentsoe leo, le Peo ea borena e entse hoo. 'Me Peo e lebeletse Mora enoa ea tl Lang, ho khutla ha Morena, ka tebelo e le 'ngoe, litebelo tse peli, litebelo tse tharo, ho ea fihla tebelong ea bosupa, 'me ke rona bana re nt se re lebeletse Peo ea borena. 'Me re bona eng pele ho ho Khutla ha Morena? Ho etsahala'ng? Molimo u theohela har'a rona, ho bontša Peo ea borena joaloka ha O sebelitse peo ea Abrahama; 'me Abrahama, 'me peo ea Abrahama, 'me Ke ena moo e leng teng 'moho le Peo ea borena. Molimo u ahileng hara rona ka sebopheho sa Moea o Halalelang, ho etsa tsona tseo O li entseng morao koana, ho etsa, ho bontša hore ke ntho e tšoanang.

'Me holim'a lipatlisiso tsa mahlale setšoantšong, lefatše le a tseba, lefatše la boramahlale le a tseba hore ke 'nene.

Kereke e a tseba hore ke 'nene, lefatše ka bophara.

¹²⁷ 'Me ke lumela Peo e 'ngoe le e 'ngoe e reriloeng e se e batla e kene, monyako o se o tla koaloa, 'me kahlolo e mothating oa ho otla. Ke hantle. Molimo o ke ke oa mamella motho halelele.

U tla etsa sohle seo O ka se khonang. Empa hora e a atamela, metsoalle. Hlokomelang.

¹²⁸ Ke tla le neha letho le tl Lang ho le thusa joale. Hopolang, ntho e latelang e etsahetseng joale ke efe? Pele ba ka amohela peo ea borena, mohlolo o ne o loketse ho etsahalla Abrahama le Sara, nameng, pele peo ea borena e ka fihla... kapa pele peo e ka tsoaloa. "Joale, 'mele oa Abrahama o ne o ichoeletse," Bibele e rialo. Na ha e joalo? "Me popelo ea Sara e ne e shoele," Bibele e itsalo. Joale ntho e ne e lokele etsahalla nama pele peō ea borena e ka ba... peo e ka hlaha, mora oa tsepiso. Le pele mora eo oa pallo a ka hlaha, ntho e ne e loketse ho etsahalla nama ea 'mele ea bona, pele mora oa tsepiso a hlaha. Shebang seo A se entseng. Ke tlil'o le fa lethoana.

¹²⁹ Joale, ho bala Bibele, Ke Pale ea lerato eo Molimo o e ngoletseng Kereke ea Oona. Ke Molimo. Molimo ke lerato. Na le lumela seo? 'Me Bibele e ngotsoe ka mokhoa hore barutehi le bahlalefi ba se ke ba E utloisia. U tlameha ho kena leratong le Molimo ho E utloisia. U lokela ho ba le Molimo ka ho uena. U Itolokela uena.

¹³⁰ Joale, ho joaloka mohatsa ka. Oh, kamoo ke mo ratang! Ke mo rata ka pelo ea ka eohle. 'Me ha ke ile mose ho maoatle kae-kae 'me u tla... hoba a robatse bana, u tla ngolla lengolo, le ho re, "Billy ea ratehang, ke lutse mona bosius bona, ke u nahanne. Kentse ke ngola." Le a bona, ke tseba seo a se ngolang pampiring. Empa kea mo tseba ke mo rata ho fihlela ke tseba tlhaho ea hae, Ke tseba seo a se bolelang, nka bala lipakeng tsa mela. Le a bona?

¹³¹ 'Me Molimo o batla hoba Kereke ea Oona e bale lipakeng tsa mela. Hase ho bala *letho* kantle ho Eona joale! U tlameha ho bala lipakeng tsa mela ho bona seo E se bolelang. Joale hlokomelang 'me le bone, ho fumana haeba E sa etse joalo.

¹³² Joale, seo Molimo o se entseng ka Abrahama le Sara, O ntse o ba bontša, mohlala oa Kereke ea Hae. U ba etselitse, Oa ba fetola mohlankana le moroetsana ba babeli. Ehlide, U entse, ho ba busetsa ho bacha hape, joalokaha O tla sebetsa Peo e 'ngoe le e 'ngoe ea Abrahama. Ho sa tsottelehe botsofali ba hau le ho katleha ha hau, letsatsi lea tla u tla ba mocha u be motle hape, ke hantle, bokhabane ba bophelo.

¹³³ Ke botsitse ngaka haufinyane, "Mpolelle, monghali. Nako le nako ha ke ej, ke nchafatsa bophelo ba ka."

A re, "E, monghali, hoo ho nepahetse."

¹³⁴ Ka re, "Joale, Molimo u boletse re 'entsoe ka lerole la lefatše.'"

¹³⁵ A re, "Ke hantle. Meroho le nama le lintho tseo u li jang ke lerole. Moo u fumanang potashe ea hau le k'halsiamo le lintho

divithamining tsa hau, u li ntša hantle lefatšeng. 'Me u entsoe ka lerôle la lefatše."

Ka re, "Hum. Joale, Molimo u e hlotse pele joalo."

¹³⁶ A re, "Ha ke tsebe letho ka taba eo, empa" ho re "ke a tseba hore joale u ja lijo 'me li aha 'mele oa hau."

¹³⁷ Ka re, "Ke a u botsa." Ka re, "Joale u ntse u mpotsa ka tsoalo ea moroetsana?"

A re, "E, monghali, ke etsa joalo."

¹³⁸ Ka re, "Ke kopa ho u botsa taba, ngaka. Ntlhalosetse ntho ena."

¹³⁹ A re, "Be, ntho efe e sa kholisoeng ke saense ha e a loka."

¹⁴⁰ Ka re, "Ke tla nka lehlakore le hanyetsang, ntho efe e netefalitsoeng ke mahlale ha e joalo, ha ho letho ho eona." 'Me ka re, "Linthro tsa mannte feela tse leng teng bophelong ke linthro tse ke keng tsa kholisoa ke saense: lerato, thabo, khotsotso, bonolo, mamello, tumelo. Ak'o nkholisetse eona ka mahlale? Koana ke ntho ea makhonthe! Molimo, Moea o Halalelang, Mangeloi!" Amen! "Tumelo e etsa linthro tseo. Ntho e 'ngoe le e 'ngoe eo u e bonang e tsoa lefatšeng, e tsoa ho 'mè lefatše, e khutlela morao ka mokhoa oo." Ka re, "Ke batla ho u botsa taba. Mohla ke neng ke lilemo li leshome le metso e tšeletseng, ke ne ke ja tsona lijo tseo ke li jang hona joale. Ke jele linaoa, litapole, le bohobe le nama. 'Me ka linako tsohle ha ke ja, ka hola ka eketsa ho ba matla."

A re, "Ehlile, u ne u nchafatsa bophelo ba hau."

¹⁴¹ Ka re, "Hobaneng ho le joalo, hoba ke fete lilemo tse ka bang mashome a mabeli a metso e 'meli, motho mang kapa mang, ho sa tsotellehe u ja hakae, u ntse u fokola ho feta? E nahane." Ka re, "Mona ke tšoere nkho ea metsi, 'me ke nkile galase; eaba ke qala ke tšolla metsi nkhang ena e kholo ho tšela galaseng ena, 'me ea tlala ea ba ea fihla bohareng; 'me ho se letho tlase mona ho hang, ha ke eketsa ho tšela ka hare, a ntse a fokotseha ho ea tlase. Ho sa tsotellehe na ke ja hakae, hantle hakae; ke ja hantle hona joale ho feta pele, halekholo ho feta."

¹⁴² Ke tsebile ho joang ho hlafuna nama ea matlalo bosiu bohole, le ho ja bohobe ba poone e le borakefese ka sirapa ea mabele, le ntho eona eo ka tinara le sophoro, hape. Ka tseba ho phela ka thata, 'me hona joale ke ja hantle ho feta. Ho lebohuoe Morena. Empa ho sa tsotellehe ke ja hakae, ke ntse ke eketsa ho fokola. 'Me qetellong ke tla omella ke shoe. Hobaneng? Hobaneng? Ke moeli oo Molimo o o sehileng. Ke hantle. E, monghali.

¹⁴³ 'Me lemohang Abrahama le Sara, ba ne ba khutletse lilemong tsa bomashome a mabeli a metso e 'meli kapa mashome a mabeli a metso e mehlano.

¹⁴⁴ Oh, u re, “Bosaoana, Moena Branham!” Ho lokile, lulang le khutsitse motsotsa feela, tloong re bale lipakeng tsa mela hang.

¹⁴⁵ Hang hoba Mangeloi ao a tlohe, ’me Sodoma ea chesoa, Abrahama le Sara ba nkile leeto le lelelele ho fihla Gerare. Ke leetohali ho banyalani ba khale. Ak’o e lekanye ’mapeng oa hau. Ba theohela Gerare. ’Me Sara ke enoa joale, nkhono, oa lilemo tse mashome a robong, a roetse bonetenyana ea letsatsi, a le letoope. ’Me Abrahama litelu tsa hae tse telele li lepeletse. Bibebe e boletse, “Bobeli ba ne ba holile lilemong.” U se ke ua leka ho re ba ne ba phela halelele. ’Me Bibebe e boletse, “Mebele ea bona e ne e shoele bobeli, ba tsofetse haholo.” ’Me ke bana ba theohela Gerare. ’Me tlase mono ho na le khosi e mocha ea bitsoang Abimeleke, ’me a ntse batla moratuo, ’me eitseha a bona Sara a mo rata. Na ho joalo? Nkhono?

¹⁴⁶ “Khele, u hlile u a fetisisa!” Abrahama a re, “U motle ho talinngoeng.” Amen. “Kea u rapela, mo bolelle hore u oa kakhaitsei ea ka.” Alleluia! U ne a bontša mono seo A tlang ho se etsetsa Peō eohle ea Abrahama. Sara o ne a le motle. Abrahama a le mocha. Ke utloa Abrahama a re, “Sara, moratuo, u a tseba ke’eng, boputsoa bo a nyamela moriring oa hau.”

¹⁴⁷ “Abrahama, lekhutla le a nyamela mokokotlong oa hau. U ntse u otloloha.” Ba ne ba khutletse ho mohlankana le moroetsana. Molimo, o ntse o bontša! Oh, khili!

¹⁴⁸ ’Me Abimeleke a mo rata, ’me a tloha a mo nka, a ka be a ne a mo nyale. Ke ’mona a hlapa, ’me a paqame a apere liaparo tsa hae tsa ho robala, ’me a peralalitse menoana ea hae, hoba a etse lithapelo tsa hae, le ho re, “Hosane ke tla nyala pabala eo ea lilemo tse lekholo”? Bosaoana! “Ngoanana e motle eo oa Moheberu! Oh, moena oa hae, thaka le lecha leo! ’Me o motle hakakang!”

¹⁴⁹ Molimo oa iponahatsa ho eena ka toro, le ho re, “U se u le monna ea shoeleng.”

Ho re, “Morena, hobaneng ho le joalo?”

A re, “Eo ke mosali oa motho.”

¹⁵⁰ A re, “U tsebile botšepehi ba pelo ea ka, Morena. O itse, ‘Ke ngoaneso eo.’ ’Me o itse, ‘Ke kakhaitsei ea ka.’”

¹⁵¹ A re, “E, ke tseba botšepehi ba pelo ea hau, ka baka leo Ke u thibetse ho Ntšiteloa.” Empa mamelang! “Empa u se u le ea shoeleng, ’me ho felile ka sechaba sohle sa hau. Monna oa hae ke moporofeta oa Ka. Ha ke khathale hore u halalela hakakang, u rapela hakakang, Nke ke ka utloa lithapelo tsa hau. Empa monna oa hae ke moperofeta! E-ea, ’me u khutlise mosali oa hae ’me a u rapelle. Haeba u sa etse joalo, u tla shoa.” Alleluia!

¹⁵² E ne e le eng? Molimo o lokisetsa Sara le Abrahama ho amohela mora oa tšepiso. Ho bontša hore ntho e latelang ka mora ponahatso ea Lengeloi lena la Molimo, Moea o Halalelang o

bontša pontšo ea Hae ea ho qetela, ntho e latelang, sena se shoang se apara ho sa shoeng 'me re nkeloa moeeng ho kopana le Mora oa tsepiso, Peō ea Abraham ea borena. Khanya ho Molimo! Alleluia! "Hobane re tla fetoha hang, ka ho panya ha leihlo, 'me re tla nkeloa 'moho ho ea kopana le Eena sebakeng. Ka hona re tla ba le Eena kamehla, Mora oa pallo." Alleluia!

¹⁵³ Oh, nke ke ka khona ho nka . . . ke tla . . . Mohlomong hosane bosiu ke tla nka khaolo ea 22, le a bona.

¹⁵⁴ Oh, kea e rata, lona ha le joalo? Ke thabile haholo, lintho tsena tsohle! Bibele e mpa e tletse ka likaqa tsena tse molemo. Ke ho nanabela feela le ho li khetha, ho li hlakola lerole le ho li sheba. Se seng le se seng sa tsona se bapisa Jesu Kreste, motho e mong le e mong, hoba ka ho Eena ho ne ho ahile bottlalo ba Modimo. Ka ho Eena, tsohle li supa teng. Ntho eohle e tsoang Testamenteng ea Khale e ne e supa sefapanong; le e ka hara Testamente e Ncha, e supa morao sefapanong. Ke hantle. Ntho eohle e teng mono. Oh!

Ho bokoe tlamo e tlamang
Lipelō tsa rōna ka lerato la Bokreste;
Kopano ea mehopolo e joalo
E tšoana le ea Holimo koana.

¹⁵⁵ Kamoo ke Mo ratang! Kamoo ke batlang ho 'Mona! Kamoo ke lakatsang 'me ke emetseng 'mele ona oa khale o katlehileng, o tetetsehileng, o pelo e robekhileng, o tabohileng ho fetoloa hoseng ho hong hona! Terompeta e tla lla 'me ba shoetseng ho Kreste ba tla tsoha. Re tla nkeloa hodimo le bona, ho ea kopana le Morena sebakeng.

¹⁵⁶ Kamoo Rebeka a nositseng kamele eo mantsiboea ha ho pholile. Eliezere ha a mo fumana hoseng. Ha a ka a mo fumana har'a mpa ea motšebole; o mo fumane leseling la mantsiboea. "Lesedi le tla chaba nakong ea mantsiboea!" Ho lokile! O mo fumane teng. O ile a ikoahela sefahleho. O ne a se na hlooho; o ne a ea hloohong ea hae. Amen. Mosadi, ke tlhaho ea hae, ea mosali, ho inehela ho monna. 'Me semelo sa kereke ke ho inehela Kreste, ho inehela thato ea Hae. Ho inehela feela! Ha a inahanele; o nka Lentsoe la Hae, e seng la motho e mong. Holane Eva a etsa hoo, re ka be re sa tlameha ho shoa; empa o mametse mabaka. Empa Monyaluo oa sebele oa Kreste o nka Hlooho ea Kreste, Lentsoe, le ho lumela Lentsoe la Molimo feela. Eo ke Monyaluo oa sebele, ea tsosololitsoeng. Alleluia! Nako e batla e fihlile, metsoalle, ke morao ho feta kamoo le nahanang. Re nakong ea mantsiboea. Moea o Halalelang o teng mona bosius bona. Kea tseba hore ke sehlotšoana, se senyenyan.

¹⁵⁷ U ka nahana, "Oh, ntho e kang eo ha e ka etsahala, Modimo o ne o tla e bonahatsa koana Roma, ho libishopo le ho bomopapa. O ne a tla tla ho mobishopo oa Methodise. O ne a tla ea seminarine

ea Baptise. O ne a . . ." E, ke seo u se nahanang. Empa ha A eso e sebetse joalo le ka mohla.

¹⁵⁸ O tla ho ba lipelo li ikokobelitseng, ba Mo lebeletseng. "Me Ke enoa bosius bona, Moea o Halalelang, Molimo, lona Lengeloi leo; mona ka pel'a boramahlale, ho paka, ke Eo 'moho le setšoantšo sa Hae se nkilweng. George J. Lacy, hlooho ea litokomane tsa menoana ea FBI, o itse, "Lesedi le otlide lense." O itse, "Mongh. Branham, khafetsa ke itse ke saekholoji, hore u ne u bala mehopolo ea batho bao. Empa" ho re "leihlo la mochini la khamera ena le ke ke la katlatsta saekholoji. Leseli le otlide lense. Le ne le le teng mono!" Ke leo moo Le leng teng. Se seng sa tsiona se leketlile Washington, DC, se babaeltsoe ka litokelo tsa molao tsa qopitso, "Bona feela Boleng bo ka holim'a tlhaho bo kileng ba nkuoa senepe ke mahlale ba ba ba pakoa."

¹⁵⁹ Hobaneng? Ha nka shoa bosius bona, ha nka kena sefaleng sena hosane bosiu, mantsoe a ka ke 'Nete. Hobane, ha se mantsoe a ka, ke a Hae. Ha ke eso re "'na." Ha se 'na. Ke be nka sitoa ho etsa letho. Ke motho joaloka lona, mo'libe ea pholositoeng ka mohau. Empa Molimo, matsatsing ana a qetelo, o tsepisitse lintho tsena, 'me ke tsena moo li leng teng! Ke Lentsoe. Holane e ne e le tšōmo ea mofuta, ho ka be ho fapane. Empa ke Lentsoe le kholisang Lentsoe ka Lentsoe, ho thasisetsoa, Bibebe ho haola. Ho thasisetsoa ke boramahlale! Ho thasisetsoa ke Moea! Ho thasisetsoa ke kereke! Molimo har'a rona! Alleluia. Ke thabetsa seo haholo. Na ha le a thaba, maobane bosiu, ha le ile la ema la nka kemo eo? Na e le entse hore le ikutloe le fapane? E tla etsa joalo kamehla, ha u emela Lentsoe la Modimo. Ho emela Kreste! U se ke oa hlajoa ke lihlong ka Eona.

Ha re rapeleng.

¹⁶⁰ O teng ka mona bosius bona ea ka ratang ho phahamisa letsoho la hae nakoana joale, le ho re, "Moena Branham, nkhopole thapelang ea hau. Ke tla, ke lakatsa ho ba e mong oa Lipeo tseo tsa Abrahama. Ha ke—ke batle ho fosa Leholimo. Rapela, Moena Branham. Kamehla tlase pelong ea ka haesale ke utloa eka hoja ke batla ho hong. Ha ke eso e fumane le ka mohla. Nthapelle, Moena Branham, Molimo o tle o 'nee eona"? Molimo a u hlohonolofatse. Shebang matsoho feela, hohle, a phahamang.

¹⁶¹ Ho ka thoe'ng ka balk'honing? Joale, hopolang, Molimo o moholo hakaalo balk'honing hakaalo ka ha A etsa tlase mona.

¹⁶² Na u a tsephe, u tiile ka seo? Phahamisa letsoho la hau. Molimo a u hlohonolofatse. Ke shebile nakoana feela. Le 'ne le rapele feela, le lule le inamise lihloho tsa lona.

¹⁶³ Moetsalibe ea ka ratang ho phahamisa letsoho la hae ka mona bosius bona, ho re, "Nkhopole, Morena. Ha ke phahamiselts moreri eo letsoho la ka; letsoho la ka ke le phahamisetsa Uena. Ke lumela ruri hobane U a phela kajeno, hore ha U a ka oa shoa; hore mohla U neng u eshoa, U ile

oa tsoha hape, ke rialo. 'Me U phela kamehla le mehla, eena maobane, kajeno, le kamehla. Ke U phahamisetsa letsoho la ka, hoba ke lumela U le teng mona"? Phahamisa letsoho la hau, ho re, "Nkhopole, Morena." Lula u ntse u rapela. Eba le tumelo ho Molimo.

Ke mokoenehi, joale? Molimo a u hlohonolofatse. O bona matsoho a hau.

¹⁶⁴ Ntata rona ea Leholimong, U bona matsoho ao. U tseba se ka morao ho 'ona. U itse, "Mojali tsoile ho jala Peō. Tse ling tsa oela pel'a tsela, ha li a thusa ka letho; tse ling tsa oela mobung o majoe; tse ling meutloeng; tse ling tsa beha halekholo." Mojali o ne a ikarabela feela ho jala Peō. Le ho lesa Moea o Halalelang ho tšoara Peo eo hona joale feela. Morena, rona...ke—ke a lumela, Morena, rona...

¹⁶⁵ Ha ho motho ea tsebang mohla O tla tla. Ha re tsebe seo. U itse, "Esita le Mangeloi a ke ke a tseba; ke Ntate a 'notši." Jesu o ipoletse A sa ka a tseba. "Ntate a 'notši."

¹⁶⁶ Joale, Ntate, ke rapela haeba ho ena le ba sa phahamisang matsoho a bona ka mona, kea kholoa ba ne ba tiile ka seo. E teng Ntho ka mora bona, eo, Moea, o ba laetseng ho phahamisa matsoho a bona, 'me ba e entse. Ba tšepahala. Lena ekaba khetlo la pele U kileng oa bua le bona, 'me e ka ba khetlo la ho qetela. Ekaba U buile makhetlong a mang, 'me ha u a hlola u buile. Ha ke tsebe. Empa, Ntate ea Maholimong, ke U rapela ho abela e mong le e mong ea lumelang pholoso.

¹⁶⁷ Lebitso la Hau le Halalelang le ke le hlomphuoe pel'a batho. Lerato la Hau le tšolleloe pelong tsohle ke Moea o Halalelang. Hlohonolofatsa baena bana ba bareri, Morena. Banna bana ba ratehang mona, bao hara khohlano, koana ba 'memile, leha ho le joalo. Hlohonolofatsa batho ba etileng.

¹⁶⁸ Ha kea ikmisetsa ho khohlalahala, ha ke a ikemisetsa ho fapana, Morena; haese ho ba le 'nete feela. 'Me ke eona feela ntho eo U tla e elelloa, ke 'nete e ka ho motho, hoba Uena u 'Nete. Utloa joale, Ntate, ke a rapela. Abela bao bosiusg bona bongata ba bona mona, bo sa kang ba phahamisa matsoho a bona mohlomong, ba tle ba bolokehe, leha ho le joalo. Aba sena, ka Lebitso la Jesu. Amen.

¹⁶⁹ Joale re sa lutse ka hlompho motsotsotso feela. Kea kholoa re siiloe ke nako ho memela mola oa thapel, empa re tla o tšoara. Motho e mong le e mong, ha u...uena, ha u tšoere karete, tšoara karete ea hau. Ha u se na karete, u e fumane. Rea...Haeba re tlameha ho lula mona matsatsi a mang a mahlano, re tla rapella e mong le e mong oa bona. Ke hantle.

¹⁷⁰ Ke mpa ke leka ho isa Molaetsa ho batho. Ke leka ho u bontša sehlooho... Haeba u ka fola; mohlomong, ha u ka phela halelele, u tla boela u kula khetlo le leng. Empa ha u ka pholosoa le ka mohla, u ruile Bophelo Bosafeleng. Le a bona? U ka folisoa, 'me

oa tloha oa lahleheloa ke pholoso ea hau... u ka lahleheloa ke bophelo ba hau, ke rialo; empa ha u pholositsoe, u ruile Bophelo Bosafeleng ke hona, u ke ke oa kula le ka mohla.

¹⁷¹ Ke a ipotsa hore le utloisisitse seo ke neng ke bua ka sona bosiung bona, hore Molimo o iponahalitse ho Abrahama le Sara mono, le ho ba fa pontšo ea ho qetela, Lengeloi leo, pele tšenyeho e fihla le mora oa tšepiso a fuoa. Ho Kereke, eona, pontšo eo, e ne e le Mora ea tlang. Ho lefatše, e ne e le timetsø. Joale, seo A se etselitseng Abrahama le bao e ne e le mehlala.

¹⁷² Jesu o tlie lefatšeng, Peo ea borena ea Abrahama, le ho etsa eona pontšo eo. Ba bakae ba tsebang hoba ho joalo, e reng “Amen.” [Phutheho e re, “Amen.”—Mohl.] Ehlide. ’Me ba e hanne. Na ho joalo?

¹⁷³ Joale, ha A ka a etsetsa Balichaba seo, hoba Peo ea borena e ne e eso tsoe, Kereke e ne e eso tsoaloe. Empa mohla Kereke e ne e tsoaloe, ’me joale e se e qetile lilemo tse likete tse peli, hantle feela... Hopolang, mono e ne e le qetellong ea tebello ea Abrahama. Eo e ne e le qetello ea tebello ea peo ea hlaho e neng e emetse Messia, hoba Messia o ne a le teng.

¹⁷⁴ Ena ke qetello ea tebello ea Peō ea borena. O teng mona, ho hlaha ha Kreste. Na le kile la leka ho arola... Sebaka se teng ka Bibeleng, le a tseba, ha ke na nako ea ho kena ho eona, ho thoe “ho hlaha ha Kreste,” e ntoo ba “ho Tla ha Kreste.” Ke lintho tse peli tse fapaneng, ka botlalo, ho “hlaha” le ho “Tla.” O a hlaha joale, ho sebetsa le rona ka sebopheho sa Moea o Halalelang, ho e phethahatsa, Kereke. E tlameha joalo.

¹⁷⁵ Haeba u noketse pampiri chelete ea dollara khetsing ea hau, e ntše u e shebe. Ka lephakong le leng ke tiiso ea Amerika; ka lephakong le leng ke tiiso ea Egepeta, piramite e roetseng lejoe la sehlooho ka holimo, joaloka leihlo le shebileng. ’Me ke hobaneng ha dolara ea Amerika e ka ngola ka tlase mono, “Tiiso e kholo”? Ekare tiiso ea Amerika e loketse e be e le tiiso e kholo mona. Empa ’Muso oa United States o a e elelloa hore ba batla kapa che, tiiso e kholo.

¹⁷⁶ Shebang piramite eo ha e ntse e nyoloha e bopeha, Kereke. Tokafatso, khalaletso, kolobetso ea Moea o Halalelang, ’me ntho eo e loketse ho faloa ho fihlela mohla... Lejoe la Sehlooho ha le eso tle ho piramite le ka mohla, Le nyatsitsoe, joalo feela ka Lejoe la Sekhutlo. Joale, empa ha Lejoe la Sehlooho leo le fihla... Nkile ka etela piramite; e matahantsoe ka phetheho hantle feela, u ke ke oa sunya leleka lehare lipakeng tsa eona, moo seretse se leng teng. ’Me ha Kereke e fihla, e leng e... Mohla Kreste a tlang ho amohela Kereke ea Hae, Kereke e tla fuoa tšebetso e kang eo hantle feela, ’me ka mohau oo e tla tsosa ntho eohle, e ntoo tloha. Ho khutla ha Lejoe la Sehlooho; ho hoeletsa, “Mohau, ho Morena!”

¹⁷⁷ Ke na le taba kelellong ea ka. Allelua! Molimo oa rona e ntse e le Molimo. O senolela bahlanka ba Hae liphiri tsa Hae. Ke buile ka Lengeloi le ileng la furalla tente, le neng le furaletse tente ka mokokotlo oa Oona, la bolela seo Sara a se nahanneng ka hare. Ke lepa hore Lengeloi leo le teng mona joale, Moea o Halalelang, eona Topallo ea Mollo, eona E neng e le ka ho Kreste. Topallo ea Mollo e eteletseng bana ba Israele pele. Topallo ea Mollo e neng e etsoe nama le ho aha hara rona. A re, “Ke tsoa ho Molimo, ke ea ho Molimo.”

¹⁷⁸ Kamora lefu la Hae, lepato, tsoho, nyolohelo, O kopane le Saule tseleng e theohelang Damaseka. ’Me Leseli la mo otla la mo liha. ’Me a re, “Morena, Morena!”

¹⁷⁹ A re, “Saule, Saule,” pele. “U mang . . . U Ntlhorisetsang na?”

Ho re, “U Mang, Morena?”

A re, “Ke ’na Jesu.” O ne a khutlide!

¹⁸⁰ O teng mona bosiung bona, a pakiloe ke Kereke ea Hae, mahlale le tsohle! Oh, metsoalle, hobane’ng re le botsoa hakaale? Ke hobane’ng ha re lutse re kobotetse hakaale? E reng—e reng Molimo o buileng Lentsoe, e reng Molimo o . . . Joalokaha Elisha a boletse, ea khutlileng ka karolo tse peli tsa Elia, a mena kobo, le re, “O kae Molimo oa Elia?” E reng Molimo o ngotseng Lentsoe, o tiise Lentsoe! Haeba Lena e le Lentsoe la Hae, ha O ke o le tsehetse! O tsepisitse ho e etsa. O tla e etsa ha re ka e lumela.

¹⁸¹ Joale e reng ke tsebise taba ena ka ho hlaka. Ha ke Motho eo. Ke mosebeletsi oa Motho eo. ’Me le lona le joalo, haeba le le Peo ea Abrahama.

¹⁸² Empa, ’na ke rera Lentsoe la Hae, le ho ema letsatsing leo phutheho e ’ngoe le e ’ngoe ea bolumeli e nkhesitseng, mekhatlo e nteleka sebakeng se seng ho ea ho se seng. ’Me ke baena ba bohlokoa feela ba ka har’ a mekhatlo eo, ba bonang Leseli, ba tla itsarella ka Lona ho sa tsotelehe seo ntlu-kholo e se buang. Molimo o hlohonolofatse banna kang bao. Molimo a hlohonolofatse basali le banna ba ileng ba ema bosiung ba maobane. Ebe nka le etsetsang? Nkopeng taba. Nkopeng hore ke etse’ng, ke tla le etsetsa eng le eng eo nka e khonang. Le batho ba Molimo. Monna ofe kapa mosali ea ka emang joalo, khabareng ea khohlano, ke a u hlompha.

¹⁸³ Joale haeba Lengeloi leo . . . Lentsoeng la Jesu Kreste e lepiloe pele, ha thoe pejana Mora motho a khutla, eona ntho e etsahetseng Sodoma e tla etsahala Kerekeng, A ke a fihle temeng.

¹⁸⁴ Ke tla furalla. Le inamise hlooho ea lona le rapele. Ruri nke ke ka bua taba ke sa ikutloe ke susumetsoa ho e etsa. Ke tla be ke le bothoto ho hlahisa polelo e joalo. Empa, ho lumela ho Kreste Mora Molimo, ho lumela hore Ke Lentsoe! ’Me Lentsoe

le entsoe bonneta nameng ea rona, ha re nka Lentsoe, hoba ke tsepiso ea Hae, "Ke tla ba ka ho lona ho isa bofelong ba lefatše, 'me mesebetsi eo Ke e etsang le tla e etsa le lona."

¹⁸⁵ Ke furaletse letšoele ka mokokotlo oa ka, Ntate ea Maholimong, bao ke ba reretseng, ka Molaetsa oona. Ke a U rapela, Molimo, ho ke ho tsejoe bosiung bona hore U sa le Jesu Kreste Mora oa Molimo, 'me U sa le Jehova Molimo. E sa le Uena maobane, kajeno, le kamehla. 'Me e ne e le Uena mono o bua le Abraham tsatsing leo tenteng. E ne e le Uena ea khonneng ho lemoha seo mosali eo a neng a se hopotse ka tenteng, le ho 'molella. 'Me hantle lekhatheng leo, a e latola, U ka be u tlositse bophelo ba hae, empa e ne e le karolo ea Abraham, monyaluoa oa hae. Morena, U ka tlosa maphelo a rona, ka baka la ho se lumele ha rona, empa re karolo ea Kreste. U ne u ke ke ua nka, ho tlosa Sara kantle le ho utloisa Abraham bohloko. 'Me U ke ke oa nka Kereke ntle le—ntle le ho utloisa Kreste bohloko. Nthuse, Morena. Ha ke na thuto. Ke feela... Morena, ha ke na letho, haese ho U lumela feela. 'Me ke a lumela. E thused, Morena.

¹⁸⁶ [Khaitseli u buoa ka liteme, khaitseli e mong o a toloka—Mohl.] Amen. Ho bokoe Molimo o phelang. Joale, O teng. Aparang tšabo, tlhompho.

¹⁸⁷ Le ka phahamisa hlooho tsa lona ha le lakatsa joalo. Joale ha se feela... Le a bona, Bibele e tlaleha ho bua ka liteme e le ho ikhahisa u inotsi feela, haese ha e ka fetoloa. 'Me haeba e le phetolelo, boo ke boporofeta ho Kereke. 'Me ka moo ke utloisisang phetolelo lekhatheng leo, e ne e le ho "Lumela Morena, hore O rometse Lentsoe." 'Me hape ha ke tle ka lebitso la ka le ka mohla, ke tla ka Lebitso la Hae. 'Me mesebetsi ea Hae A ka e etsang ka 'na ke hona, ka ho rera Lentsoe la Hae le ho thasisetsa Lentsoe la Hae. Ka sebele. Ke lumela seo. Na le lona le lumela hona hoo? Ba bakae ba e lumelang joale, pele A...? Molimo a le hlohonolofatse. Joale, ke eona tsela, ke eona tsela. Baballa motsitsa oo oa tekanyo 'me u tla bona ho etsoa hong.

¹⁸⁸ Ke tla furalla letšoele, hoba oo e ne e le Moea o Halalelang feela u paka taba eo. Le a bona? Ipheng matla le hore ho etsoe'ng. Joale le lumele kantle mono har'a letšoele, motho e mong. Ha ke bone motho eo... Ba bakae ka ntle mono ba kulang le ba hlomohileng, kapa ba nang le motho ea mahlomoleng, kapa ntho eo u e rapellang, 'me u a tseba ha ke tsebe letho ka eona, phahamisa letsoho la hau feela. Be, kea kholoa e batla e le hohle. Be, ha re lumeleng feela joale. Le se ke, ho se be motho ea tsamaeang, mpheng feela... Ke e—ke metsotso e leshome le metso e 'meli pele ho leshome. Mpheng metsotso e leshome le metso e 'meli, na le tla khona? Ho se be le motho ea sisinyehang. Ho se be le motho ea tsamaeang, ho hang. Lulang le khutsitse tu joale. Khetlo le leng feela, bula pelo ea hau.

¹⁸⁹ [Moena o bua ka liteme, moena e mong o a fetolela—Mohl.] Amen. Kea U leboha, Morena, kea U leboha. Ka tšabo re hlompha seo ka pelo eohle ea rona. Eo ke neo ka hara Kereke. Lulang thapelong, ka tšabo feela.

¹⁹⁰ Hopolang, khetlo le leng ha ba phaletse ntoeng, ba ne ba sa tsebe mokhoa oa ho khahlana le ntoa e kholo ena. Davida o ne a eme mono, a ba arolela leqa la nama le mohope oa veine. Empa Moea oa theohela holim'a monna e mong, a porofeta le ho ba bolella moo ba tla khahlana le sera, 'me ha eba joalo.

¹⁹¹ Re khahlana le ntoa e kholo, moena. 'Me re eme ntoeng e kholo hantle hona joale. Moea o theohile 'me, holim'a motho, le boleletsoe seo le lokelang ho se etsa, ho "lumela." O ntse a leka ho tlosa kelello ea lona hore ke 'na. Le a bona? Ba bang ba lona ba tlamehile ba be hopotse hore ke Moena Branham ea lekang ho etsa ho hong. Ha se 'na; ke Eena. Ke mpa feela. . . Neo ke feela ho inehela feela, joaloka ho kena gereng. Joalo feela ka maekrofounu ona, ho o bulela, ntho e loketse ho bua ka ona. Ke gerenyana feela eo ke kenang ho eona, nthoana. Moea o Halalelang! Ha ke kene ho eona; O kena ho eona. 'Me O a bua; ha se 'na. Joale le apare tšabo 'me le lumele, e mong le e mong oa lona, 'me le mpe le rapele.

¹⁹² Joale, bohole ba tseba hore Bibile e boletse seo "Hona joale Jesu Kreste ke Moprista ea Phahameng ea ka angoang ke maikutlo a bofokoli ba rōna." Ha ho le joalo, phutheho e ke e re, "Amen." [Phutheho e re "Amen!"—Mohl.] Na Ke Moprista ea Phahameng ea tšoanang? E reng, "Amen." ["Amen!"] Haeba E le Moprista eeena eo e Moholo, O ne a tla sebetsa ka ho tšoana. Na ho joalo? ["Amen!"] Amen. Joale u ne u tla etsa joang?

¹⁹³ Joale, ho nkama, ho ke ke ha etsa phapang ea letho; ke monna. Empa ho Mo ama, ke moo E leng Moea o Halalelang o leng ka hare ka *mona*, ebe moo A arabelang le ho sebelisa melomo ea motho. Hobane, Ke Morara, rona re makala; ha A bebe tholoana, O mpa a matlafatsa lekala feela.

¹⁹⁴ Ke hore, ho furalatsa mokokotlo oa ka feela, le tle le bone lintho tseo ke li buileng.

¹⁹⁵ Joale, bareri bana ba holim'a kalana mona, ba ntse ba rapela. Le ka ncheba ha le batla. Hoo ho itoketse. Ho bona feela, le ka 'na la tseba hore ba mpa ba. . . Hoba, u molisa, ke uena ea alosang linku tsena. Kahoo, hore feela le tle le tsebe. 'Me ke batla le nthapelle, baena. Ehlide, na le bona seo ke se bolelang? Ke eme sebakeng sa eena Kreste eo le mo sebeletsang. 'Me 'na ke moena oa lona, moahi 'moho oa 'Muso, le lona baena. 'Me ke mpa ke le mona feela. . .

¹⁹⁶ Le a bona, joale, hantle hona joale Lentsoe leo ke le rerileng, le a bona, Le tsietsing. Hona joale hantle, ho hlolleha, ke sona seo Satane a batlang ho se bona. Ke phetho seo a se batlang. Empa Molimo hase ho hlolleha. Le mpe le apare tšabo feela.

¹⁹⁷ Joale ke furaletse ka mokokotlo oa ka, ke batla motho... E reng ke e fetole, e hohle feela. E reng ke fetohele lephakong lena, pele, ke ntoo fetohela lephakong le leng lena. Joale motho e mong motšeо ka nqa ena; ba bangata haholo, joalo, ba ntseng ba rapela. Morao ka nqa ena, motho e mong a rapele morao mona hona joale, ea batlang ho lumela Molimo. Lumela feela ka pelo ea hao eohle, morao ka mona kae-kae.

¹⁹⁸ Joale, Ntate ea Maholimong, ke—ke U ananela melaetseng eohle ea Hau, sohle seo U se entseng. Joale nthuse, Morena. Ke a—ke a... ka tumelo, ke lumela Uena, Lentsoe la Hau. Ke lumela hore E ne e le Moea oa Hau o mpilelitseng ho etsa sena. Joale ho ke ho tsebjoe hobane ke buile 'Nete. Ke pakile ka Uena, joale paka, Morena, hore ke boletse 'Nete. Ke e kopa ka Lebitso la Jesu. Amen.

[Khaitsei o bua ka lipuo—Mohl.]

¹⁹⁹ Ntate Molimo, re emetse tlhaloso ea seo. O boletse, ka Bibeleng, e tla etsoa ka "mekhahlelo ea boraro," 'me oo ke oa boraro. Joale re—re rapela hore—hore U tle u e tsebise motho ea nang le lineo tsa phetolelo. Ke e tlohelletla Uena, ka Lebitso la Kreste.

[Moena o hlahisa boporfeta—Mohl.] Kea U leboha, Morena.

²⁰⁰ Joale, boo e ne e le boporfeta, ha se phetolelo. Le a bona, o buile ho feta kamoo mosali a entseng. Phetolelo ke eo e fihla. Le a bona, monna eo e ne e le moporfeta.

²⁰¹ [Moena o a fetolela—Mohl.] Amen. Kea U leboha, Morena.

Ka kotlolohlo ka mora ka...

²⁰² [Khaitsei o a rapela—Mohl.] Molimo, abela mosali eo lehlohonolo, o a e llela. Etsa feela...

²⁰³ Joale le apare tšabo ea sebele feela joale, 'me le e lumele ka pelo ea lona eohle. Joale, ka Moea o Halalelang, ke ntse ke leka ho hlahisa Lentsoe leo ke le rerileng, seo A se pakileng hore se tla etsahala. Joale le lumele ka pelo eohle ea lona.

²⁰⁴ Motho o teng o eme ka pel'a ka, o lutse ka mor'a ka. 'Me ke mosali. 'Me o na le bothata ba pelo. 'Me o tšoenngoa ke liajeji. O ka mor'a ka. Haeba mosali eo a e-so eme... Mokhopi o shebileng; ke koetse mahlo. O boetse o tšoentsoe ke moratuoa, ke hore, monna oa hae ea lutseng mabapa le eena feela; o shoelie litho, o ikokotlela ka molangoana. Lebitso la mosali ke Mof. Brumley. Lumela ka pelō eohle ea hau. Ema 'me u amohele seo u se rapeletseng, 'me u tla neoa seo u se kopileng. Ema ka maoto a hau. Na o eme? [Phutheho e re, "E." —Mohl.]

²⁰⁵ Molimo a le hlohonolofatse. Ha ke tsebe mosali eo, ha ke eso 'mone bophelong ba ka. Re basele e mong ho e mong. Ho na le... Joale ba botseng, tlohang le ba botse haeba e nepahetse na. Joale haeba e se 'ona Molimo o nong o le tlase mono pejana ho Sodoma, ha ke tsebe seo e leng sona.

²⁰⁶ Motho e mong ka lephakong lena lumela joale ka pelo ea hau eohle. Morena Jesu. Ho na le mosali ea lutseng hantle ka mor'a ka. O na le takatso e tebileng. O rapela Molimo ho mo fa ntho. Ke lesea, o ntse a le rapella. O hantle mona ka mor'a ka. Mof. Holm, ueme 'me u lumele Morena Molimo. 'Me ha u ka e lumela ka pelo ea hau eohle, u ka fumana lesea leo eo u le rapellang.

²⁰⁷ Mosali o a kena, 'me o holofetse. O lutse setulong sa bakuli. O ka mor'a ka. Ha a tsoe karolong ena ea naha. O tsoa—o tsoa Sacramento, Sacramento e ka leboea. Esale a kula haholo. Lingaka ha li khone ho mo thusa. O ne a le kokelong. O entsoe liopereishene tse 'maloa. O jeoa ke liphio, bothata ba masapo. O t'sohile feela, ho fihlela a t'soeroe ke mathata. O mobe haholo. Mof. Beeler, mono, phahamisa letsaho la hau 'me u lumele hore Morena Jesu . . . le ho etsoa . . . Molimo a u hlohonolofatse.

²⁰⁸ U a lumela? Molimo o sa phela o a busa. Haeba u e lumela ka pelo eohle ea hau!

²⁰⁹ Mosajana ke enoa, ke ntse ke mo shebile a lutse mona. O jeoa ke bothata ba colon. Lebitso la hae, ha ke mo tsebe. Empa na u a lumela Molimo a ka mpolella hore u mang, mofumahali? Mof. Berglund. U lumele ka pelo eohle ea hau, 'me u ka fola. U lumele.

²¹⁰ Mofumahali ke enoa o lutse hantle mona, a rapella motsoalle ea sa tsoa hlaheloa ke kotsi. U lumele ka pelo ea hau eohle, u ka fumana seo u se kopileng.

²¹¹ Ho na le mofumahali ea lutseng mono a t'soeroe ke hlooho. Na u lumela ka pelo eohle ea hau? U ka fola. Se belaele. Lumela feela. Haeba E se Molimo o le mong, ha ke tsebe hore na Ke mang. O teng mona ho—ho, ha u ka e amohela le ho e lumela.

²¹² [Khaitseli o buoa ka liteme, moena o a fetolela—Mohl.] Amen. Bokang Morena.

²¹³ Na ha le elelloe hoba le ka pela Sefahleho sa Molimo? Le etsa joalo. Joale ke nahana seo re lokelang ho se etsa ha joale, kamora hore Moea o bue, "Tlong ho 'Na, le lumele ho 'Na, sechaba sa Ka," ke hopola re tlameha ho emela memo ea aletare hona joale, le ho lumella ba sa tsebeng Kreste ho nyoloha ba teele aletare hare mona ba Mo amohele e le Mopholosi oa lona. Haeba u eso amohele Moea o Halalelang, u ka tla, le uena, ho amohela Moea o Halalelang, hobane ke sona feela se tlang ho etsahala. Na u ke ke ua tla joale re sa fumana lehlaso; motho o tla etella 'mino pele. Moea o Halalelang esale o bua. Molimo a u hlohonolofatse, khaitseli. Ke hantle. Motho e mong a tsoe le mofumahali mona. Nyoloha hantle u tle haeba u e-na le . . . Molimo a u hlohonolofatse, khaitseli. Ka pel'a Sefahleho, mono Bibele, Lentsoe, thasisetso, lineo, ntho eohle e a sebetsa, na ha ho babatsehe hona joale? Tloong hantle aletareng. Theohang le tsoe liotloaneng. Uena ea se nang Molimo, u sa tlatsoa ka Moea, tloo joale re sa bina.

Jesu o feta le ka mona,
 Ka mona, kajeno;
 Jesu o feta le ka mona,
 O feta le ka mona kajeno.

Jesu o feta le ka mona,

Na u ke ke ua tla joale A sa feta, Moea oa Hae o ntse o tsamaea, ho re, “Tloo”?

. . . kajeno;
 Jesu o feta le ka mona,
 O feta le ka mona kajeno.

²¹⁴ Na u ke ke ua tla A sa ntse a feta? Shebang seo A se etsang har'a lona, ho bontša hore E sa le eena. Tsoa hantle, moea o mong le o mong o sa Mo tsebeng, o sa tsoaloa labobel. Na u ke ke ua tla joale ho Mo batla? Hopolang, oona Moea o Halalelang oo o a u tseba.

. . . le ka mona kajeno.

Jesu o feta le ka mona,
 Le ka mona, kajeno;
 Oh, Jesu o feta le ka mona,
 O feta le ka tsela mona.

²¹⁵ Joale moea o mong le o mong o sa tsebeng Molimo o tle joale, o se nang bonnete ba maemo a hau. Tloong le theohe. Le se—le se . . . Le se ke la rua mohopolo oa eona oa hlalefo, moena, khaitseli. Le se ke la etsa joalo. E ka ba u entse maikutlo a mofuta ofe. E ka ba u fumane mali matsohong a hau, sefahlehong sa hau, mohlomong oa thefuleha, joalo-joalo. Ha ho letho khahlano le hoo, joale, ho itoketse. E ka ba u buile ka lipuo, e ka ba u hobetse ka Moea, oa 'na oa lahleha. Ke hantle. E ka khona e be Bophelo bo tsoaletsoeng ka ho uena, bo nkang Lentsoe lena le ho Le phelisa ka bocha hape. Le a bona, Kreste ke Lentsoe. 'Me haeba le joale u eso fumane tumelo eo ho kena Lentsoeng leo le ho Le lumela, na u ke ke oa tla joale.

²¹⁶ Joaloka Kereke ea Molimo, e re Maseli a mantsiboea a sa qala a chaba, le e—sefate se ntse se butsoa; Molimo o itse O tla busetsa sefate seo, sona sefate seo sa pentekosta, Tumelo e tšoanang, ntho eohle eo ba neng ba e tšoere, sefate seo se tla tsosolosoa hape; kantle ho mokhatlo oa bolumeli, kantle ho letho, e tla fihla ka matla a nyatsehang a Moea o Halalelang, ho ruta Bibele hantle feela kamoo O kileng oa etsa. Re tšepisitsoe e mong matsatsing a qetelo, le a tseba, ho fihla le ho busetsa Tumelo eo. Ka hona ke lumela hore O teng mona bosiusing bona, ka sebopeho sa Moea o Halalelang. Tloong joale, re sa ntse re bina hape, re tle re be le bonneta ba hore re e entse.

²¹⁷ Joale hopolang, haeba meeaa ena . . . Lona batho ba Pentekosta le hlile le lumela lineo tsa lona tsa lipuo le liphetolelo! Haeba le sa khone ho lumela seo A se entseng *mona*, joale

le lumele lipuo tsa lona le phetolelo ea lona, tse le biletang aletareng. E mong le e mong a tle. Hae u bona *seo* se sebetsa, *sena* se sebetsa, Molimo o sebetsa, khele, ke Molimo! Hakakang, Lentsoe ke lena mona le a E thasisetsa, le bolela hore Ke 'Nete. Tloong. Khetlo le leng hape joale, 'me u tle joale.

Jesu o feta le ka mona,
Kajeno, kajeno;
Jesu o feta le ka mona,
O feta le ka mona kajeno.

²¹⁸ Joale bao ba lumelang ho Molimo, bareri ba sebele ba bahalaleli le—le bahlanka ba Kreste, tloong, tsoang le tle, re sa bina hape joale. Atamelang haufi le aletare, le teele bana hare. 'Me ha re rapeleng le bona, 'moho. Tloong. Na le ke ke la tla mona? Ha ke khone ho ba fihlela, e mong le e mong, ka matsoho a ka. Ke batla hore le tle. Lona baena ba bang ba bareri le theohele har'a bona tlase mono joale, le tle le ba ame le ba behe matsoho. Ho lokile. Lona ba tsebang Molimo, tloong, le nyolohe le teele hare mona, lona basali ba bang 'moho le basali bana, lona banna 'moho le banna bana. Nyolohelang holimo mona joale. Ena ke e—e taelo ea Molimo. Nyolohang joale, lōna batho. Ke, ke eona, ke eona nako. Lona bommè ba barapeli le lona baena ba bang ba barapeli, nyolohang le teele hare mona joale le tle le ba behe matsoho, e le thasisetso, ho ba beha matsoho a lona ba tle ba amohele Moea o Halalelang. Ho lokile. Joale, ke eona. Ke eona.

²¹⁹ Joale, hobaneng le tlide? Hobane u a lumela. U kholisehile hore Molimo o har'a rōna. O teng mona bosius bona. O teng mona o sebetsa ka mehlolo le meeka e meholo.

²²⁰ Atamelang haufi, bohle. Kena hantle hore batho ba fumane sebaka se sengata. Atamelang hantle haufi. Ho na le ba bangata ba theohang ka liphaseje, le a bona. Atamelang haufi feelsa.

²²¹ Ke ba bakae hara letšoelé ba tsotellang batho bana ba emeng mona joale, ka poloko ea meeaa ea bona? Phahamisang matsoho a lona. Ho lokile. Ha re kopaneng bohle joale, re phahamisetseng matsoho a rona ho Molimo, 'me re kope thapelo.

²²² Ntata rona ea Maholimong, re tlisa ho Uena bosius bona mokhupi ona, ka Moea o Halalelang har'a rona, o leng teng joale, ho phelisa Lentsoe la Hae ka bocha hape. Tlatxa pelo e 'ngoe le e 'ngoe, Morena. Kena ka matla a Moea. Aba sena, Morena. Leleka tšabo e 'ngoe le e 'ngoe, liabolosi e mong le e mong. Kena ka matla a Molimo, le ho hapa meeaa ena. Ka Lebitso la Jesu Kreste, ke ba nehela Uena bakeng sa khanya ea Hau.



JEHOVA-JIRE 2 SST62-0706

(Jehovah-Jireh²)

LETOTO LA JEHOVA-JIRE

Molaetsa wona, ka Moena William Marrion Branham, o rerilwe sethatong ka Senyesemane Labohlano mantsiboya, Phupu 6, 1962, Municipal Auditorium, Grass Valley, California, U.S.A., o ntshitswe kgatisong ya teipi ya makenete mme o ngotswe o sa kgaolwa ka Senyesemane. Petolelo ena ya Sesotho sa Borwa e ngotswe mme e abjwa ke ba Voice Of God Recordings.

SOUTH SOTHO

©2023 VGR, ALL RIGHTS RESERVED

VOICE OF GOD RECORDINGS, SOUTH AFRICA OFFICE
58 DISA ROAD, ADMIRAL'S PARK, GORDON'S BAY 7140 WESTERN CAPE
REPUBLIC OF SOUTH AFRICA

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Temoso Ea Tokelo Ea Qopitso

Litokelo tsohle li babaletsoe. Buka ena e ka porintoa ka porintara ea lelapa molemong oa motho eo kapa ea abjoa, ntle ho tefiso, e le thepa e jalang Evangeli ea Jesu Kreste. Buka ena e ke ke ea rekisoa, ea boela ea hilahisoa ka bongata, ea manehoa leboteng la website, ea bolokoa ka tsela eo e ka boelang ea ntšoa, ea fetoleloa ka lipuo lisele, kapa ea sebelisoa ho qela matlole ntle le tumello e ngotsoeng ea Voice Of God Recordings®.

Ho fuoa boitsebiso bo bong kapa bakeng sa thepa e nngoe e ka fumanoang, ka kopo ikopanye le:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org